

東
華
續
錄

東華續錄

咸豐二十四

臣王先謙敬編

臣陶澐宣蒸校

六月甲戌朔諭內閣戶部奏截卸漕糧例外浮銷請飭查繳一摺
南糧截卸北倉歷年辦有成案豈容任意浮銷致多冒濫茲據該
部查明本年倉場奏借長蘆運庫銀六萬兩辦運北倉糧石所開
款目多有牽混浮濫之處著倉場侍郎嚴飭坐糧廳按例覈實報
銷其多借銀二萬四千兩除抵撥銀二萬兩外尚餘銀四千兩迅
卽解部毋稍延緩並著該侍郎查明咸豐元年經手辦運北倉漕
糧例外多銷銀兩於各該員名下勒限追賠以清庫款而昭覈實
○諭刑部奏審擬已革提督失守罪名一摺已革丁憂湖南提督
余萬清係奏畱幫辦防堵之員與見任專城者不同且帶兵僅二

百名亦與坐擁重兵遇賊先逃者有聞惟既赴道州防堵輒因兵力過單出城堵截以致被賊衝突失陷州城究屬守禦不力仍應按律問擬余萬清著照部議定爲斬監候秋後處決○乙亥諭內閣托明阿西凌阿善祿奏追剿獲勝一摺該逆自汴梁西竄經托明阿西凌阿先督馬隊跟蹤追剿沿途疊有斬擒於二十五日追至汜水縣城分兵三路進攻善祿亦督催步隊趕到從後會剿該逆敗匿縣西北山大溝迤後勢已窮蹙亟應迅速殲除絕其搶船偷渡之路著托明阿等分督官兵趕緊剿擊毋令占踞河干見在恩華已帶兵前進慧成循黃河北岸截剿勝保亦將抵汴梁陸應穀卽日帶兵出省並派令經文岱柏山帶兵追剿卽著各路統兵大臣四路兜圍分投截擊諒此股匪不難悉數埽除也○諭前據王懿德奏會匪滋事漳州鎮道被戕及延平府屬之永安沙縣

先後被擾當經降旨令將失事情形查明具奏並飭調撥兵勇激勵紳民迅速剿辦茲據奏稱四月初十日夜間突有會匪數千攻撲漳州復於城內潛伏縱火以致府城失陷該署鎮曹三祝該道文秀罵賊不屈同時遇害旋於十二日午刻經近城鄉民及在城紳士密相邀約會合遊擊饒廷選所帶官兵奮勇追擊殺斃賊匪千餘名生擒賊匪謝厚僞軍師陳金斗並匪黨數百名卽行正法餘匪逃竄府城收復又延平府城於四月二十九日亦有賊匪率眾攻撲經署副將李壽春護道胡應泰等先後擊斃二百數十名又大田德化兩縣均有匪徒闖入肆搶經大田紳士雇勇聯鄉殺斃賊首黃有及匪黨數百名永春州官紳擒獲僞軍師林仁德等二名當卽正法又另股匪首林俊竄入永春州城經署遊擊恩需守備歐陽斌等與在城官紳併力剿殺斃賊一百餘名奪獲器械

無算生擒首逆林俊之兄林倫及夥黨十五名卽時正法賊匪紛竄當將州城克復等語此項會匪土匪本係烏合之徒總由地方文武守禦無方以致賊至卽陷該省士民深明大義協力剿擒克復城池實屬忠義可嘉卽著該督先行傳旨獎勵並查明出力人員據實保奏一面仍遵前旨剴切曉諭乘此剿辦得力之時認真團練自相保衛協助官兵並嚴飭帶兵及地方文武合力兜拏迅將首逆殲擒脅從解散以期一律肅清毋畱餘孽至廈門匪徒經提督施得高調集兵船追擊殲斃多名該署督並飭漳州鎮總兵郭仁布鹽法道瑞瓚等定期水陸並進著將攻剿情形迅速具奏

○諭軍機大臣等王懿德奏漳州失守鎮道被戕旋卽克復並永春被陷旋亦收復各摺片該匪疊陷城池殊堪痛恨漳郡克復是否因該道之子恩志殷賊復讎該處紳民激於公憤不邀而集抑

實由海澄縣知縣汪世清等出城邀結紳民密圖克復著該督確查具奏至於鄉民之出力紳士之內應具見民心忠義守禦堪資該署督諭令團練並示以殺賊立功從優奏獎自應如此辦理見在江南用兵徵調已多福建僻在一隅鄰省兵力亦俱不足不如激勵紳民自相保衛較爲切近而易圖況聞該省民情甚爲可用果能眾志成城可助兵力之不逮前調廣東兵二三千名浙江兵二三千名本日已催令該督撫星速調撥來閩應援至江西見在設防緊急未能再行調撥所需餉銀准其將解往貴州兵糧銀四萬兩一併截畱備用該署督又請飭部撥銀三十萬兩已令戶部速議具奏矣將此由六百里加緊諭令知之○諭本日據托明阿陸應穀等先後具奏賊匪搶船偷渡當有旨令訥爾經額哈芬派員迎剿頃據王履謙奏賊匪渡河於五月二十六日溫縣失守覽奏

憤懣之至該縣距懷郡僅四十里直隸山西俱與毗連著訥爾經額卽選得力將弁飭令星速前往迎頭截擊該督亦應相機進剿勿示賊以弱俾該逆大受懲創方好並著哈芬派委大員酌帶兵勇馳往會剿此股渡河賊匪原非大隊果能迅速堵禦無難一鼓殲除然不可稍存輕易之心見已有旨令恩華兼程前進惟該尙書所帶之兵需用馬匹如尙未能解到卽著訥爾經額於直隸營馬內抽撥迅速解往以利進行毋稍遲誤將此由六百里加緊各諭令知之○諭托明阿奏賊竄汜水追剿獲勝情形並陸應穀奏賊匪偷渡黃河北岸已過汜水竄擾鞏縣等語該匪在鞏縣趙莊等處搶船行駛或北竄懷衛或順流直下均未可定若任其奔竄則直隸山東山西陝西各省皆有蔓延之患恩華由濟甯進兵所需車輛諒已陸續齊備慧成循黃河北而行均與賊蹤相近卽著

探明賊勢與托明阿陸應穀等協力會剿勝保計日可抵汴城並
著跟蹤追躡何路緊急卽往何路攻剿無論河南河北恩華慧成
勝保等總須亟力兜圍不難殲除淨盡見已命花里雅遜布署理
河北鎮與長臻同防河岸山東有李德瑞昌帶兵守禦陝西山西
亦命該督撫派兵出境於交界之所不分畛域偵探剿捕聞此股
賊匪多半脅從並非大隊經各路重兵圍合斷不能西入山陝北
至山東直隸恩華等務當趁此兵力迅速前進早殄妖氛以固北
路藩籬朕不勝盼望將此由六百里加緊各諭令知之○諭托明
阿等奏追剿獲勝並陸應穀奏探聞賊匪偷渡黃河各一摺據稱
賊匪被剿紛竄間有乘船東下及竄往北岸者汜水縣西北河岸
復有大小船筏百餘隻一時難以殲除並有賊在鞏縣趙莊等處
搶船駛行之事是該逆潛蓄詭謀帶兵大員無論黃河南北跟蹤

追剿該撫亦卽日帶兵出省督剿該將軍等務當不分南北併力
攻圍將賊匪悉數殲擒毋畱餘孽其經文岱柏山所帶官兵卽著
飛催夾擊毋稍遲延將此由六百里加緊諭令知之○諭陸應穀
奏探聞賊匪偷渡河北竄擾鞏縣並托明阿等奏連日獲勝賊竄
汜水西北土山各等語賊匪由開封西竄節經降旨令陸應穀出
省督剿見在該匪竄至汜水意圖北渡所有與豫接壤之直隸山
東山西陝西等省急宜扼要設防已有旨令該督撫嚴密防堵並
督兵協剿復諭令長臻等嚴防渡口恩華慧成勝保三路官兵兼
程前進矣該匪經托明阿等殲獲甚多勢已挫衄果能合力夾攻
不難迅就撲滅該撫令經文岱柏山帶兵追剿該撫亦卽日出省
計各路官兵已不爲少若儘力北驅則河南肅清北路將不可問
問該撫是何居心總當併力追擒殲除淨盡勿令偷渡黃河或向

南逐勦亦可萬萬以固藩籬爲至要陸應穀斷不可被紳民畱住
仍在省城著先其所急統兵勦賊據托明阿等奏沿途州縣多係
先期遷徙城垣一空以致任賊竄掠並無嬰城固守者似此情形
殊堪髮指著陸應穀迅卽查明如有先期逃避及賊至卽行潰散
者著卽一面奏明一面正法庶足以作士氣而飭戎行將此由六
百里加緊諭令知之○予福建漳州殉難總兵官曹三祝道員文
秀等祭葬世職○丙子山東巡撫李德奏賊竄劉家口請將曹州
鎮總兵官三星保等革職得旨邵懿辰何不查參或因該員係河
工差委抑係因由軍機章京出去柰難參辦汝若止於拘泥猶可
若別有掩飾迎合之處則大不可若素知邵懿辰才長可用而遷
就模稜則亦不可況該員外似有才內實詭譎心地平常似可不
必代爲彌縫也總之各省大吏斷不可豫存揣度之心李德非好

交結者尙且有不到之處若庸劣之輩不知何等揣摩也李億著傳旨嚴行申飭速將邵懿辰退縮情形查明參奏並著該部將此殊諭徧行曉諭各直省督撫知之○調盛京兵四千名赴直隸防堵○撥河南司庫銀七千兩給托明阿軍營餉需○戊寅諭內閣托明阿西凌阿善祿奏攻剿賊匪續獲勝仗一摺據稱逆匪盤踞汜水縣城於城內安設槍礮抵死守禦該將軍等於二十八日督兵進剿分滿漢官兵四路圍攻該逆見我兵槍礮緊急欲由東門逃竄經密雲滿洲兵斜放聯環槍礮隨打隨堵斃賊多名該逆復退回城內時綏遠城滿洲兵攻開北門黑龍江馬隊隨同入城剿殺東南城角亦有我兵上城施放槍礮該逆見我兵勇氣百倍由西門逃竄二十九日復由南岸用礮轟斃賊百餘名搜擒長髮賊千餘名西北山溝已無藏匿等語逆匪由開封竄擾汜水經該將

軍等督兵追剿疊獲勝仗帶隊官員及滿漢兵丁無不勇往直前一可當百覽奏實深欣慰托明阿追賊迅速連次接仗大挫兇鋒洵屬調度有方著加恩賞戴花翎並賞給白玉翎管一枝白玉四喜搬指一箇西凌阿係獲罪之員此次擊賊尙屬奮勉若能趕緊追賊續獲全勝當與善祿同邀恩賞也該將軍等務當乘此聲威渡河追剿諒此潰散餘匪不難一鼓殲除此次出力將弁兵丁著托明阿查明據實酌保候朕施恩毋許冒濫○琦善奏臣督攻揚城用礮連環轟擊將城垣轟壞丈許連日城身攻塌漸多雙來因有機可乘用木棍作爲浮橋過河支架雲梯首先奮勇直上率同弁兵先後登城臣直至城下督戰一面知會陳金綬等飭令各路兵勇登城接應臣福濟亦派來鄉勇二百名奮勇登城者十餘人福濟查文經亦親督兵勇馳往東門攻打維時北面已經登城

之兵槍矛並進斃賊不可勝計兼用火箭將城內房屋燒毀數處正在攻擊得勢乃近在西路之兵俱不肯向前僅恃城上官兵與賊接仗該逆在城樓施放槍礮拋擲火彈城上簷蓬城下板屋齊然我兵被火燄薰蒸致總兵雙來左頰被槍子打入折落牙齒二箇一時暈倒幸爲兵丁扶下其餘弁兵傷亡甚多勢在危急臣當卽親催陳金綬督飭官兵登城詎呼應不靈陳金綬雖身先向前眾兵尙復逡巡觀望城上官兵因無接應勢不能支仍行退下此次登城殺賊可冀克復旋因接應不力未能得手以致守備楊發把總袁竣德藍翎額外溫魁額外王林陣亡參將李志和等受傷統計陣亡受傷官兵甚多陳金綬係幫辦軍務大員當此軍情喫緊調遣無策咎實難辭相應據實參奏可否摘去頂帶以觀後效出自 聖裁其隨陳金綬直隸帶兵各員俟臣查明分別參奏臣

攻剿揚城日久無功應請將臣交部議處其陣亡受傷官兵由臣

咨部分別辦理上諭內閣此次登城殺賊總兵雙來奮勇先登

猝被槍傷實屬果敢出力惟因西路之兵接應遲緩以致揚城未

能克復陳金綬身任提督幫辦軍務督率無方著摘去頂帶戴罪

圖功琦善調度失宜著卽革職畱任陣亡之守備楊發等俱著交

部從優議卹陣亡弁兵一併照例議卹○諭軍機大臣等前因河

南逆匪搶船北渡溫縣失守諭令訥爾經額選派將弁星馳迎剿

本日據托明阿等奏該匪數千盤踞汜水縣城我兵於二十八九

兩日連次攻剿疊獲勝仗克復縣城惟北岸有賊營盤踞虛實尙

未探確等語此股賊匪半多褻脅不過數千人經托明阿等先後

斬擒不少其勢漸衰惟賊眾業已渡河懷衛一帶甚屬空虛見在

南岸別無船隻托明阿等所帶馬步隊恐一時不能全渡若任令

賊匪渡河肆行裹脅比及直省境界其勢又熾該督見派花里雅遜布馳往亦止帶兵五百名仍恐不敷攻剿之用河北密邇直隸若不趕緊派兵前往接應乘賊奔竄未定痛加剿洗豈竟坐待境上又蹈各省覆轍耶著該督迅派得力鎮將統帶精兵前赴河北與花里雅遜布併力迎擊本日已諭令托明阿等渡河攻剿正可會合前後夾擊賊匪本係烏合之眾若我兵奮勇直前不難剋期殄滅該督務當不分畛域督飭鎮將越境剿賊懷衛一帶肅清則直隸藩籬自固此係萬分緊要關鍵勿仍視爲尋常防堵也將此由六百里諭令知之○諭本日正在寄諭聞據訥爾經額奏稱接得豫省急報總兵董占元卽率領將弁帶兵一千三百名馳赴溫縣一帶迎剿該督仍飭總兵花里雅遜布爲後路聲援所辦甚合機宜並據稱遵查天津地方情形請將盛京步隊兵二千名在天

津彈壓著照所議分別屯紮該督卽飛咨盛京吉林並飭沿途地方妥爲豫備仍嚴飭赴豫援剿之鎮將等迅速前進奮力攻剿毋稍延誤將此由六百里諭令知之○諭陸應穀奏賊匪搶船渡河竄至北岸復有船在河面遊奕見在帶兵趕至鄭州進剿又片奏經文岱柏山欲往汝州經該撫飛催折回均未據咨覆各等語覽奏殊深憤懣陸應穀身任封疆鎮將以下皆歸節制似此疲玩不職之員何不卽行參奏以肅軍律著該撫傳旨經文岱柏山該鎮等避近就遠有意遷延若再不遵調度折回稍遲貽誤事機定以軍法從事所稱賊匪竄入懷慶欲往山西等語見在懷慶府如何守禦抑係被賊竄踞所奏殊未明晰山西鄰境仍當隨時知照一體嚴防毋稍疏虞將此由六百里加緊諭令知之○諭琦善奏官兵登城接仗因無援應尙未克復又片奏盤獲奸細嚴顯裕供稱

賊匪欲分股進攻六合由來安天長取道接應豫省股匪該大臣見令瞿騰龍赴六合堵禦各等語覽奏實深憤懣賊踞揚州數月以來尙未克復見又有由六合分股北竄之信儻賊勢蔓延愈難剿辦該大臣見令瞿騰龍在六合堵禦著卽飭該總兵迅速帶兵徑赴六合防守毋令賊匪北竄其浦口儀徵等處亦應一律嚴防並隨時知照李嘉端豫爲防範毋稍疏懈至此次攻城雖未得手該大臣等仍當督飭將士奮勉進攻迅圖進復毋得再蹈因循致干重咎將此由六百里諭令知之○己卯諭內閣前經疊降諭旨令各省督撫曉諭紳民實行團練自衛鄉閭近閱河南奏報逆匪自竄汴梁屢經各屬鄉民協助官兵沿途剿殺遂致窮蹙西奔可見兵民同心賊眾卽無從肆擾見在大兵疊次獲勝汜水一帶賊匪焚剿無餘難保其不亡命奔突希圖四竄所有毗連河南之直

隸山東山西陝西等省業經諭令該督撫等各統重兵扼要防守
出境會勦各該省風俗敦龐民情強固自能同心協力各保閭閻
特恐地方官吏不能認真勸鎮撫居民致令風鶴驚疑紛紛遷
移殊非朕安輯黎元之意茲特再行申諭各該督撫嚴飭所屬實
力舉行團練一州一縣之中地勢險夷民風柔勁身爲牧令必應
纖悉皆知平日果能好惡同民臨事自能禦災捍患豈得以事勢
難辦推諉因循各該紳士世守田里聞見較真其應如何設防之
處定能各就情形妥爲布置總期先事豫防有備無患官民相信
則眾志可以成城蠢爾么虜定不難剋期掃蕩也軍興以來徵調
頻仍供頓勞苦不免重累吾民朕念切民依難安寢饋封疆大吏
皆有司牧之責其各體朕意徧行宣示毋再延玩將此通諭知之

○江西巡撫張芾奏五月十八日有賊船千餘隻乘北風大作直

撲江西省城停泊陳孚恩等所帶練勇逼近江邊無險可據且未經行陣能守未必能戰既恐寡不敵眾又因城內兵單撤隊入城一同登陴固守江西民情柔弱自聞警報紛紛遷避在省紳士及工商匠役人等無不遠颺幸一切軍需平時竢備且自江忠源來省所帶楚勇皆係敢戰之士軍心稍振惟僅一千二百名七門各派一百名駐守其餘五百名作爲游兵策應賊船來時卽經臣張芾陳孚恩江忠源等督同楚勇與本省各營官兵在城上施放礮擊沈匪船三隻該匪又用小船鈔入南門外之南海經知府林福祥督率游兵點礮擊沈賊船二隻並有手執黃旗登岸者均經兵勇擊退是日共擊沈賊船五隻斃賊一百餘名臣等與江忠源商議乘賊初到布置未定簡選輕銳潛師鈔擊惟城外民房稠密臨時折毀不及止得縱火焚燒但非厚集兵力戰守難操勝算請

飭向榮張亮基等迅速撥兵應援不特保障江西實於東西全局
大有關係 上諭軍機大臣等本日據張芾奏賊船已撲省城急
待援兵助剿一摺覽奏曷勝焦急朕思該逆分股竄擾原圖牽掣
江南大軍現在江西省城情形緊急若多分江南兵力又恐掣動
大局墮賊奸計本日已諭令湖廣督撫迅速撥兵應援向榮軍營
能否撥兵前往之處著酌量緩急辦理如果金陵及早克復何至
賊黨分竄滋蔓難圖向榮等前次遣散之說殊不足恃仍著速籌
攻克金陵先將大股殲除則餘黨亦聞風而潰儻再不能統籌全
局迅掃妖氛朕惟有執法從事無他諭也至向榮糧臺本由江西
支應見在該省道路必有梗阻應改移何處爲妥各處餉銀務須
隨時知照沿途地方繞道妥護毋稍疏虞將此由六百里加緊諭
令知之○諭據張芾奏賊船直撲省城見在守禦情形一摺賊船

沿江上竄徑撲省城經該撫等督率兵勇乘其初到擊沈船五隻
斃匪一百餘名見在城外民房多已拆毀城中糧餉軍火均尙充
足亟應悉力固守以待援兵著卽會同陳孚恩督同江忠源並在
城文武各員分派兵勇激勵紳民認真防守毋稍疏懈城外兵勇
旣不能不撤回城中仍須時出奇兵於城外江干截擊挫賊兇燄
嚴防偷窺地道密拏奸細毋令內外勾結本日已飛諭張亮基崇
綸駱秉章等於湖南湖北兩省派兵迅速赴援向榮亦已諭令撥
兵協剿惟金陵尙未克復該處官兵又經瞿騰龍分帶二千北上
儻因此分兵掣動大局亦不可不慮各省以自固藩籬爲重朕則
南北兼籌通計孰非吾土孰非吾民惟有先其所急以期有濟向
榮之能否分兵應援尙未可豫定聞吉南贛道周玉衡辦理防堵
素稱得力若令管帶兵勇乘此灘漲順流急下較之湖南北官兵

尤爲近便該撫此次所發摺報與前次所發僅後一日何以遲至
六七日始行遞到如果道路梗阻卽應知照沿途設法繞越以速
爲要廣東接濟兵餉見解在途者共有十四萬餘兩亦著迎探接
護萬不可使有疏失九江等處是否爲賊占踞沿途何處被賊擄
掠前後奏報均未聲明殊深繫念將此由六百里加緊諭知張芾
並諭令陳孚恩傳諭江忠源知之○諭本日據張芾奏賊船千餘
艘直撲江西省城急籌固守以待救援等語此股賊船前經張亮
基以設法解散入奏見經直撲江西省城自係辦理未能得手惟
江西待援甚迫若待他處撥兵前往均屬緩不濟急湖廣爲江西
最近省分著該署督撫等卽於湖北湖南兩省遴選得力鎮將帶
兵迅速赴援俾得速解省城之圍萬不可稍有耽延致誤事機其
湖北應行設防之處仍著該督撫各就見存之兵移遠就近扼要

駐紮以遏逆匪被勦上竄之路將此由六百里加緊各諭令知之
○庚辰諭內閣奕山等奏回子郡王捐備軍餉等語回子郡王前
任葉爾羌三品阿木伯克愛瑪特呈請捐輸俸銀以備軍餉具見
惻忱惟念該郡王所得俸銀藉資當差著毋庸捐輸以示體恤○
諭前據李嘉端奏已革藩司李本仁之子監生李以牧捐輸軍餉
銀五萬朕以該監生捐輸意在爲父贖罪而國法所在豈容開此
僥倖之門降旨飭部照例將該監生議請獎敘茲復據李嘉端奏
據該監生呈稱伊父見在縲絏不忍仰邀獎勵等語著戶部暫行
存記俟軍務告竣再行奏明請獎○革職畱任安徽巡撫李嘉端
奏交還壽州鎮總兵官玉山拜發 萬壽賀摺因道阻折回未便
驛遞懇請免其補遞得旨西路賀摺皆由驛遞此事亦稍涉拘泥
玉山係總兵大員非汝屬員此事固無緊要若有要件亦可交還

乎汝外任尙淺已狃於文大武小之積習可惡之至嗣後痛加改
悔該鎮賀摺見已逾期著不必補遞○雷以誠奏琦善連日攻城
東路一帶萬分喫緊勢難兼顧臣卽飭鹽知事銜張翊國帶勇赴
五臺山以便策應是夜琦善極力攻城總兵雙來與張翊國各帶
兵勇登城斃賊六七百名城內之賊拚死抵拒槍礮齊施四面火
起張翊國等身已受傷寡不敵眾止得奮力殺出張翊國係殉難
江南縣知縣張行澍之姪本屬忠義傳家茲復身先進城殺賊圖
報雖全城未復而以寡擊眾實爲行軍所難應否將總兵雙來鹽
知事銜張翊國先行量予鼓勵出自逾格 天恩 上諭此次琦
善督兵攻城總兵雙來與管帶壯勇之鹽知事銜張翊國各帶兵
勇登城殺賊以寡敵眾實屬奮勇可嘉雙來著賞加提督銜張翊
國著給予五品頂帶並賞戴花翎以示優獎○辛巳諭內閣訥爾

經額奏派兵會同勦賊獲勝一摺據稱前派直隸署昌平營參將烏爾清額會同彰德府知府戴鸞翔於五月二十八日擊獲賊船該逆受傷落河死者無數又據前往彰衛迎勦之大名鎮總兵董占元稟稱賊匪竄進溫縣城內經該處紳民鄉勇擊退竄至武陟縣復經該處紳勇隨同營員攻勦將賊匪逼至司馬集團困等語此次逆船徑撲北岸經官兵會擊先挫其鋒該地方紳民復能協力勦賊與官兵聯爲一氣甚屬可嘉見在陸應穀經文岱等俱帶兵過河追勦各路帶兵大員俱已陸續趕到本日已命訥爾經額爲欽差大臣著卽督飭諸軍併力攻勦並傳旨曉諭各屬紳士合志同仇迅殄醜類毋稍延緩○命訥爾經額爲欽差大臣尙書恩華江甯將軍托明阿幫辦軍務○壬午 萬壽節停止筵宴 上詣 皇貴太妃前行禮○諭軍機大臣等據托明阿等馳奏初四

日馳抵滎澤河口探聞賊匪竄偃懷慶府城並有另股土匪附從助勢見已添調兵勇合力兜撿另片奏該逆竄入密縣又竄新鄭該處距省一百餘里經文岱柏山遠在汝州勢不相及陸應穀折回保護省垣等語昨已有旨令托明阿幫辦軍務著卽與西凌阿善祿等趕緊渡河會同直隸官兵併力夾擊毋失事機陸應穀保衛地方仍當相機出省剿賊勿但株守省城毫無策應仍著飛催經文岱柏山趕卽帶兵由汝州折回迎頭截擊如再遷延觀望遠避不前朕必重治其罪決不姑寬本日據周天爵等奏五月二十八九日雷雨大作豐北復成漫口當此逆燄未平又遭水患百姓流離失所殊堪憫惻陸應穀務卽督飭地方文武遇有災民入境妥爲安撫勿使逆匪乘間勾結將此由六百里加緊諭知托明阿西凌阿善祿陸應穀並傳諭經文岱柏山知之○諭崇綸奏逆匪

分竄江西見因該省兵單擬由楚多發兵勇派委幹員統領前往江西會剿滅此股匪勝於防範戒嚴等語所見甚合機宜前因賊船直撲江西省城諭令該署督撫等卽於湖北湖南兩省遴選得力鎮將帶兵迅速赴援江省被圍兩旬有餘昨據沈兆霖由撫州馳奏該省於二十一日開城打仗頗有斬擒惟未據張芾續報朕心實深懸繫張亮基見往道士洑一帶履勘要隘著卽就近速派得力鎮將大員統帶兵勇二三千名趕赴江西救援駱秉章亦卽酌派兵勇數千遴委鎮將管帶直赴南昌合力攻剿除江西之賊匪卽可以固全楚之藩籬該署督撫等務各不分畛域協濟鄰封江西待援孔殷萬不可稍有延誤豫省之賊有渡河竄入溫縣者有在密雲新鄭滋擾者湖北防堵不可稍疏崇綸見駐省垣一切防守事宜著卽趕緊製造毋誤事機至所稱防禦經費各就本省

之徵收捐助應用等語見在調兵累萬部中籌餉實形支絀該省
見辦防堵著卽照該撫所議辦理將此由六百里加緊各諭令知
之○諭周天爵奕經奏豐工決口急宜嚴防土匪一摺據稱豐工
大壩近因水漲溜急於二十八二十九兩日雷雨大作黃水漫溢
過隄刷開口門三十餘丈等語覽奏不勝焦急已諭令楊以增查
勘明確設法撫恤災民矣見在江甯等城尙未收復豫省賊匪雖
屢經挫衄而北岸溫縣武陟等處已有餘匪竄擾當此用兵之際
又復河決豐沛淮海一帶赤子何辜復遭此劫朕顧瞻南服寢饋
難安儻逆匪探聞河決勾結災民爲患更鉅該侍郎等督帶兵勇
在徐州一帶著卽體察情形妥爲布置應如何嚴防土匪彈壓地
方務當妥速籌辦並飭臧紆青管帶壯勇保護糧臺毋稍疏虞其
難民中如有才技之壯丁亦宜量爲招募俾爲我用不至流而爲

匪將此由六百里諭令知之○諭周天爵奕經奏豐北大壩因水
長湑急五月二十八九兩日雷雨大作黃水漫溢過隄隄身坐墊
刷開口門三十餘丈大湑北趨十八里屯插水已斷流等語覽奏
實深焦急豐北大工今春甫經合龍見復漫決當此賊氛未靖籌
餉維艱又復出此鉅工該汛文武所司何事該河督此時諒已奏
報在途其決口處所係何工段是否卽上年開決之處河流見在
從何處入海著楊以增確切查明繪圖貼說據實具奏並將失事
員弁嚴參軍務未竣又遭河患皆朕不能誠格 上天朕罪復加
吾民何辜汝亦諒吾衷也至被災難民蕩析離居深堪憫惻著卽
設法妥速撫恤勿致被賊黨及土匪暗相煽 其壯丁酌量招充
練勇勿令流而爲匪該河督惟當體察情形撫綏彈壓迅速籌辦
將此由六百里諭令知之○癸未庫倫辦事大臣德勒克多爾濟

等奏俄羅斯國遣使呈遞文件據稱該國管船官普提雅廷由海島買物折回欲進上海歇息並懇祈進口貿易奏入 上諭怡夏許乃釗密飭吳健彰查照成案妥爲開導防範○甲申諭內閣王懿德奏剿捕土匪情形一摺福建彰泉等府及上游延平永春各屬土匪滋事經該署督調派官兵及各屬鄉民義勇奮力剿殺將被擾城池陸續收復茲據奏稱漳州收復之後復於四月二十八等日殷斃攻城逆賊多名並擒獲僞大將軍吳魁僞軍師僧碧雲僞公姚添賀等三名又延平攻擾之賊經提督炳文督率文武迎擊斬獲甚多五月初三十一等日迭次獲勝斃賊六七百名奪獲器械無算城圍已解其同安縣賊首黃露業蔡懋昭等十一名永春大田等州縣賊首林倫等十六名均經該州縣糾集丁壯會同營員收復城池拏獲正法安溪縣城賊匪亦經該代理知縣陳鳳

音聚勇殺退殲斃多名等語此股匪徒旋起旋滅本省兵民本已足敷剿辦見在廣東等省官兵不日即可到閩會剿兵力愈厚烏合之眾當不至再有蔓延又據奏臺灣鳳山等縣均有匪徒戕官情事已飭副將呂大陞前往接應並由臺灣總兵恆裕督兵分路進剿著卽嚴催速辦務期悉數殲除臺灣民情素悍豎旗滋事之案本所時有該鎮道等果能協力和衷何至匪徒日肆乃據王懿德奏該道徐宗幹與該鎮恆裕意見不合單銜密稟意欲因病引退非惟取巧亦甚屬無恥當此剿匪喫緊之際豈宜各挾偏私致有貽誤恆裕未能先事籌防亦斷難辭咎恆裕徐宗幹均著先行交部議處仍責令該鎮道督率文武迅將滋事各犯按名拏獲儻再推諉卽行嚴參其捕賊被戕之臺灣縣知縣高飛鴻鳳山縣典史張樹春著交部照例議卹○江西巡撫張芾奏省城西南北各

門外民房牆垣焚毀未盡該逆環踞其中開放槍礮且暗挖地道
攻勦殊難得手臣等與江忠源商議於五月二十日令楚勇頭目
由永和門空心礮臺突門出隊該逆三四千人在高坡開放槍礮
楚勇直撲賊隊該逆抵敵不住退至坡後楚勇站定該逆拌死回
撲復被楚勇擊退往復四次傷斃賊匪約百餘名正相持間知府
耆齡林福祥都司景星及各將弁督飭兵勇施放大礮擡槍並經
糧道鄧仁堃新築空心礮臺督飭練勇於臺內連放大礮絡繹不
絕斃賊甚多林福祥復親放連珠火箭並點大礮轟斃不少該員
因礮位退坐致傷骹足各營奮勇兵丁復下城助戰矢石如雨該
逆始全行散退先後約共傷斃賊匪二百餘名生擒長髮賊五名
斬獲長髮首級七顆官兵傷亡者幾至百名臣與臣陳孚恩皆在
城上督戰該文武員弁等均能用命楚勇尤屬奮勇敢戰以一當

百據江忠源稱陣亡把總李光寬身經百戰所向無前此次打仗身先眾勇深入賊隊中槍身故深堪憫惜李光寬前經擬保都司請旨加恩照都司例賜卹應保之勇長另開清單恭呈 御覽至知府林福祥以文員隨同督戰點放火箭大礮正中賊隊身受數傷請賞換花翎並遇江省知府缺出請旨簡放見在加築月城並鼓勵士卒下城焚屋清濠以防地道暗攻嚴拏奸細以弭內訌江忠源忠勤懋勉籌畫周詳營員兵丁無不悅服實屬禦侮之才未便任其困守一隅仍請旨速催援兵庶可早日解圍俾該司得以北上至所調南贛九江兩鎮兵均尙未到查南贛離省較遠且各邊界有事皆已分兵防堵展轉徵調一時未必能來至九江鎮兵已報啟程迄今未到該總兵未免意存畏葸請旨將護九江鎮總兵羅玉麟暫行革職畱任仍催令趕緊赴援再觀後效 上諭此

次文武員弁兵勇人等出城擊賊均能用命江忠源前在湖南屢著戰功所帶楚勇尤爲奮勇出力可嘉之至知府林福祥以文員督戰身受數傷猶復晝夜登陴亦屬奮勉著賞換花翎陣亡之把總李光寬身先眾勇深入賊隊中槍身死深堪憫惻加恩著照都司例賜卹以慰忠魂羅玉斌著暫行革職仍嚴催迅赴省城如再遷延卽著從嚴參辦○諭張芾奏逆匪竄擾南昌經該撫督率文武出城剿辦該省官員或派稽察城門或派巡查街道乃閉城之後均未與該撫見面並有未奉差委屢傳不到者顯係先期遠避若不嚴行懲辦何以肅官守而勵人心所有南安府同知楊正祥撫州府通判范壽椿饒州府通判王煊宇候補知縣劉世煒祁啟萼萬安縣知縣黃瑞圖峽江縣知縣蔡廷蘭試用知縣袁思韓均著卽行革職交該撫查明畏葸退匿確情嚴參治罪○諭琦善奏

遵查已革都統遇賊退避各情一摺已革都統西凌阿管帶黑龍江官兵在浦口散住民房於帳房解到後並不安紮營盤漫無準備爲賊所襲自應治以應得之罪惟西凌阿見帶黑龍江官兵在河南勦賊未便令其置身事外西凌阿著暫緩治罪交托明阿責令該革員戴罪自效儻再不奮勉朕惟有執法從事決不寬貸○諭駱秉章奏查明上年嘉禾縣城失守情形並請將同城之文武員弁革職審辦一摺上年粵匪竄擾嘉禾該縣文武員弁如果實力捍禦保衛城池何至被賊竄入乃該縣知縣吳澹韶膽敢棄城逃走至今並無下落實屬畏葸偷生吳澹韶著卽革職交該撫迅速嚴拏務獲卽行正法以肅軍律該縣把總王萬年典史彭文徵教諭陳南紀著卽一併革職交該撫審明按律懲辦毋稍輕縱○諭軍機大臣等吳文鎔等奏回匪滋事戕官一摺雲南東川府屬

湯丹廠回匪馬二花等糾聚多人聲言欲報漢民從前焚搶之仇
膽敢焚燒街市民居殺斃多命復將署參將明恆傷跌殞命並拒
斃官兵多名復有距城數十里之三官廟等處同教之匪聞風乘
勢焚搶似此兇橫肆行不法已極見經該督撫等調兵會同剿辦
並繕發告示曉諭漢回良民毋被煽誘吳文鎔見已統兵出省籌
剿復招募土練以期一鼓殲除自應如此辦理前有旨令吳文鎔
速赴閩浙新任此時剿匪緊要著俟羅繞典到任後再行奏明赴
任該督迅卽督飭鎮道各員相機進剿及早撲滅應如何彈壓撫
綏之處並著體察情形妥籌速辦總期綏靖地方毋致蔓延貽誤
署參將明恆跌厓殞命著查明請卹將此由五百里諭令知之○
諭本日據琦善奏拏獲縋城長髮賊並另獲奸細搜出逆書各等
語據稱所獲犯供有賊匪如得渡黃卽圖北竄如不得渡仍回長

沙之說見在賊已過河此種奸細難保不到處窺探著訥爾經額恩華托明阿於駐紮扼要處所各飭兵勇盤詰奸宄卽有稱難民來歸者亦須詳細查訊萬不可墮賊奸計再聞北竄之賊所掠資糧有限見乏米石其逆書中所稱紅粉卽係火藥該逆奔竄飄忽斷無暇製造鉛藥專恃掠取該大臣等嚴飭所屬於糧餉火藥等項加意防護勿爲賊掠仍當迅速追剿四路兜圍斷其接濟其被剿必竄之路尤當豫爲布置嚴密防守勿令滋蔓原片並所獲逆書均著鈔給閱看將此由六百里諭知訥爾經額恩華托明阿並諭令善祿西凌阿知之○諭張芾奏省城剿守情形一摺南昌省城自被賊匪攻撲以來連日出剿獲勝並防守一切均臻嚴密江忠源所帶練勇尤爲出力業已明降諭旨將出力文武員弁分別獎勵並將陣亡之把總等破格賜卹矣張亮基見駐道士泐昨已

有旨令其選派鎮將督帶兵勇馳赴救援本日復令駱秉章曾國藩迅調鎮守鎮兵八百名並令曾國藩將團練得力之楚勇酌派數百名遴委員弁管帶趕赴江西交江忠源帶同攻剿張芾務當會同陳孚恩江忠源等一面力籌守禦嚴拏奸細暗防地道一面與各路援兵內外夾擊以期一鼓殲除至江省民情素稱懦弱即紳士等亦不免紛紛遷徙以致人心惶惑惟陳孚恩暨在籍已革臬司徐思莊郎中陳景謨主事汪茹鑑等仍在省城巡防守禦足爲士民矜式徐思莊係已革大員著先賞給六品頂帶以示獎勵至所稱在籍各員或畏賊避匿或聞警遠颺著該撫再行剴切勸諭並將幫辦團練首先逃避之紳士查明具奏總期眾志成城勿爲浮言所惑致誤大局該撫所聞調赴江南大營之四川兵勇取道九江擬請截畱等語此項川兵並未徵調恐係傳聞之誤九江

南贛官兵仍卽飛催赴省無令遲延將此由六百里加緊諭令知之○琦善奏六月初一日我兵用炸子礮打入揚城斃賊多名該逆防守益堅並句通瓜州賊匪搶占虹橋又欲句通江甯鎮江賊匪前赴浦口由六合旱路向揚州接應臣以爲此時先須嚴防各路斷賊接應庶不至顧此失彼因咨會漕臣福濟嚴防東關督飭知府福楙添帶兵勇協同紳董防守虹橋臣又分飭添防南路官兵嚴扼要隘並商同漕臣先將儀徵停泊舊糧船五隻在三汊河地方墜石沈舟以遏由瓜州上竄水路並飭總兵瞿騰龍馳赴六合協同防堵以備賊匪北竄查賊踞江甯等三城大江爲其所有賊蹤來去自如兵力不敷勢難兼顧臣奉命在江北攻剿止可先圖克復揚城然卽以揚城而論亦有賊眾兵寡之虞况瓜州賊巢近在肘腋江甯鎮江之賊聲息亦復易通見在函致向榮添雇艇

船於江面截擊以斷賊船之來路一面飛飭文武各員會同紳士分帶兵勇扼守虹橋使賊不得應援或可相機收復 上諭本日據琦善奏連日進攻揚城賊眾兵寡等語覽奏殊堪詫異朕以琦善才尙可用棄瑕錄取特命督師江北節制諸軍原期一振聲威殲除醜類乃數月以來擁兵邗上收復無期糜餉老師咎將誰諉茲復以妖氛肆擾藉口兵力不敷且云卽以揚城而論亦有賊眾兵寡之虞其將無計可施任賊安踞乎抑待賊全行竄出中原糜爛而後收復空城以奏功乎見在度支告乏軍餉不濟大勢實屬可憂是以特加硃諭限於季夏以前全數埽蕩此朕不得已之苦衷該大臣豈竟不動於心耶總之迅拔揚城惟該大臣之功若日事遷延以致兵驕將怯皆不用命則該大臣之罪不可追矣罰罪賞功國法具在勿以疊奉嚴旨視如弁髦也瓜州紳士雖有挫失

幸虹橋未失水路尙有可扼該匪不至任意往來毫無顧忌該大臣等仍當剴切勸諭紳士義勇協力效忠功成膺賞至於肅清江路以斷賊蹤當與向榮合謀江面艇船與瓜州團練互相策應庶可迅掃賊氛所奏賊情片二件並搜獲逆書一紙已鈔給北路統兵大臣及各督撫閱看將此由六百里各諭令知之○諭本日據張芾奏賊撲省城出戰獲勝一摺已諭令加意防守並迅催援兵夾擊矣此次南昌省城獲勝多係江忠源所帶楚勇之力惟賊鋒雖已稍挫兵力尙單昨已諭張亮基等撥兵赴援仍須湖南添派兵勇一同援應據駱秉章等奏調赴省城鎮守永綏等營弁兵共一千六百名著卽於此項兵內抽撥八百名馳赴江西省城並將見募湘鄉等處練勇酌撥壯健者數百名派員管帶星夜前往交江忠源調遣以資守禦江忠源籍隸湖南其勇略素爲鄉人所服

委以楚省兵勇定能得力若江省稍有疏虞則楚省藩籬亦難自
顧該署撫等其妥速籌之勿誤事機將此由六百里加緊各諭令
知之○署湖南巡撫駱秉章前任禮部右侍郎曾國藩奏金陵賊
船上駛調兵防堵情形得旨賊蹤無定向使處處防堵焉有若是
之多兵防剿之事惟應探逆匪與本省相近卽出兵痛剿不可仍
存疆界之見冀免處分也○內閣學士勝保奏瀝陳賊勢兵機並
周天爵不協輿情得旨汝所見甚是周天爵善受人欺斷非有心
誣誤者○以豐工決口革河道總督楊以增職仍畱任○予江南
陣亡內閣中書鍾淮祭葬世職○乙酉諭軍機大臣等前因賊匪
渡河竄擾懷慶一帶降旨命該督爾經額督飭鎮將前赴河北進剿
哈芬於山西交界扼要截擊毋任分竄茲據給事中張煒奏稱溫
縣武陟皆與山西澤州潞安等府僅隔太行一山太行迤東爲山

西河南交界由東轉北爲山西直隸交界見在賊匪被圍司馬集
惟有聚而殲旃並扼聚險要遏其竄逸等語見在訥爾經額所派
總兵花里雅遜布董占元等想已與賊接仗日來未據奏報殊深
懸繫托明阿等何時帶兵渡河恩華是否趕到兵貴神速該大臣
務當相機調度迅掃賊氛萬不可稍有延誤山西與河南直隸唇
齒相依哈芬是否出省如何設法防剿何以日久亦未奏報澤潞
爲太行要隘有險可守若能派撥得力將弁帶兵扼要進擊不但
自固藩籬並可爲懷慶聲援著該撫遵照疊次諭旨迅速妥籌布
置並親督兵勇進剿毋得稍涉延緩貽誤事機張煒摺著鈔給閱
看將此由五百里各諭令知之○丙戌諭內閣吏部奏遵議河督
處分一摺河東河道總督長臻巡查河口是其專責乃先事未能
豫防至賊已渡河始奏請赴豫修防實屬不知緩急長臻著改爲

降三級畱任不准抵銷至太常寺卿王履謙經朕特派巡查黃河口岸於賊匪偷渡未能防範亦難辭咎王履謙著降二級畱任不准抵銷仍責令會同該河督嚴密稽查毋稍疏懈○諭李德奏遵旨查參一摺分發東河學習之刑部員外郎邵懿辰經朕特派隨同河督巡查黃河口岸並有旨傳諭實力嚴防茲據該撫奏稱該員於河南歸德失守時將劉家口船隻收歸北岸尙未疏防惟於燒毀船隻後輒離防所雖無守土之責咎實難辭邵懿辰著交部議處所有李德自請議處之處著加恩寬免○諭前曾疊次諭令黃河兩岸豫收船隻防賊偷渡茲據李德奏河南賊匪由洛入黃聞係搶取汜水一帶煤船北渡等語洛河船隻地方官何以不豫爲收集致令該匪偷渡北岸著陸應穀長臻查明賊匪所搶船隻是否係汜水輦縣管轄卽將各該管地方文武並河工員弁一併

據實嚴參按律治罪並著嚴飭沿河地方州縣及河工廳汛加意嚴防毋得再有疏懈○諭軍機大臣等前據訥爾經額奏探聞渡河賊匪在司馬集地方被民勇圍困該大臣見已進駐磁州相機勦辦數日未見續行奏報朕心實深懸繫此股渡河賊匪雖爲數無多然不及早勦滅恐裹脅日眾又滋蔓延該大臣務卽督飭花里雅遜布董占元等迅速進勦毋稍遲誤前有旨令慧成折回江北茲據李德奏稱曹河見無逆匪則慧成之兵自無須株守東省該大臣卽行知慧成徑赴河北一帶有賊處所協同攻勦不可以有用之兵置之無用之地有人奏查乾隆年間陝甘總督福康安奏請每兵一名備炒麵十五斤足供半月糧餉設遇調遣立時攜帶啟程卽倉卒不能爲炊亦可拌食等語著該大臣體察情形酌量妥辦將此由五百里諭令知之○諭逆匪分股竄擾河南江西

原圖牽掣大軍分我兵力前據張芾奏江西省城情形危急曾諭令湖廣督撫撥兵應援江南軍營能否撥兵前往並諭向榮酌量緩急辦理原以金陵圍攻正在喫緊之際且著名首逆俱在城中一旦分兵他去恐致墮賊奸計該大臣初到金陵時攻剿似尙得手乃迄今未能克復而逆匪已由水路分竄若再遷延觀望防範疏懈致令著名首逆潰圍而出向榮身爲統帥其何以當此重罪耶近日攻剿情形如何金陵鎮江二城何時可以克復江南上下游艇船是否合力攻剿著該大臣等迅速奏報以慰廑念將此由五百里諭令知之○河南巡撫陸應穀奏報賊圍許州督兵進剿得旨許州緊急不可不援若東路續有賊來亦應籌及○賞調駐南苑察哈爾官兵羊隻○貸浙江回空各幫丁南糧餘米○丁亥諭軍機大臣等托明阿奏督兵渡河相機攻剿長臻奏稽察渡口

各一摺據該將軍奏稱督催馬步各隊官兵四千餘名晝夜趕渡於六月初十日業已全行渡過北岸等語懷慶一帶賊匪若不及早撲滅恐裹脅日多又滋蔓延托明阿與善祿西凌阿等見已渡河著卽帶領官兵迅速追剿務將懷慶等處賊匪盡數殲滅該處與山西澤州接壤清化鎮又係繁庶之區若賊肆行搶掠飽颺而竄太行止隔一山已偏晉省門戶哈芬雖已派員防堵而兵力尙單將才亦少儻任賊匪竄入山內則北達井陘已據直隸之險隘關繫甚重著托明阿等督兵速往截剿萬不可令其竄入太行惟當乘勢緊躡賊蹤與晉省防堵官兵前後夾擊必可一鼓殲除至黃河南岸賊匪據陸應穀奏竄至許州勝保前由鹿邑進行諒可不日趕到著仍遵前旨確探賊蹤何路緊要卽由何路進剿務使河南之賊不能搶渡北岸則河北之賊來源截斷剿辦更易得手

至河南船隻疊經嚴旨諭令陸應穀長臻等飭屬收集而此股賊匪卽係由洛搶船過河北竄地方文武及應汛各員所司何事儻再不實力防範致令南岸之賊乘閒偷渡朕惟陸應穀長臻是問王履謙巡查河口並著會同一體認真查緝毋再疏忽致干重咎將此由六百里諭令知之○諭本日據哈芬奏探聞澤州隘口有賊匪三千餘名盤踞該省兵力尙單請調兵援應等語山西省兵疊經調往河南山東直隸等省均難撤回存省兵已無多必須就近省分撥兵援應見在賊匪在懷慶澤州之間著舒興阿卽撥兵二千名配齊軍裝器械遴委得力將弁管帶迅速取道蒲州直抵懷慶等處會同托明阿等攻剿毋稍延誤該督仍當加意防守本境陝州蒲州爲山西河南三省要路水陸均須嚴防勿令匪蹤闖入將此由六百里諭令知之○戊子向榮許乃釗奏

臣榮從各營

將弁中擇其尤爲勇敢者各於所部選擇勁兵得三千二百人臣榮親與瀝血誓破此城特爲另紮數營以便隨時出隊六月初二日飭令各營兵明攻朝陽門龍脖子兩處密派勁兵潛襲太平門查該處賊營三座中通一路僅容一夫來往我兵卽從此路進攻廣西藍翎額外彭得標首先躍入賊壘連斃數賊我兵乘勢魚貫而進直薄城闔該逆於城上拋擲火彈火輒斷我進路而迤北繞出之賊又於賊營外包鈔我兵廣西義勇趙全福見大黃旗下有穿黃馬褂賊目一名指揮賊眾馳往直前砍其首級兵丁楊玉勝等又將執旗之賊砍倒諸賊復向城根逃遁我兵圍攻賊營奮力鏖戰自寅至午次第撤回斃賊百餘人內有大小賊目六名槍礮擊傷者不可勝數我兵陣亡弁兵彭得標蔡世松等九名其餘傷亡兵勇四十二名亦皆數年中從征敢死之士均以勇戰捐軀受

傷深爲可惜臣榮加意撫恤各兵勇激於義憤無不踊躍用命復於次夜二鼓潛襲朝陽門城內賊眾亦有潛出襲我者遂於黑暗中互戰良久擒獲長髮賊一名餘皆被創入城城上槍礮矢石如雨我兵退還收隊研訊長髮賊據供楊逆以圍久不解擬用火牛衝動大營先令該逆等前來試探此初二初三晝夜兩次進攻大略情形也省城東南北三面防守極嚴惟旱西水西二門該逆防備較疏因另行躡覓路徑設法進攻以期得手至鎮江師船前據署總兵李德麟暨藩司麟桂等稟稱五月二十四日夜賊用火船四排乘風下駛意欲圍燒我船後有白蓬船十餘隻跟蹤開礮兼施火箭各艇船連用大礮擊沈賊船數隻白蓬船遂紛紛逃回二十九日東南風起各艇船駛至鎮江瓜州兩口與賊船接仗三時之久擊沈賊船十餘隻臣查賊情詭祕萬端若非設法出奇未易

制勝

上諭軍機大臣等前經疊降諭旨令向榮等速籌克復金

陵並將攻剿情形隨時奏報茲據奏屢次奮力攻城及鎮江師船接仗並撥兵援應江西及籌辦糧臺等情此次攻偏賊營直薄城閩兵弁俱奮勇爭先無所畏怯乃進攻兩晝夜總未得手而敢死之士復多有傷亡甚爲可惜至該逆於東南北三城防守極嚴惟旱西水西二門備禦稍懈該大臣等業經躡覓路徑擬從西面攻其不備著卽相機布置毋得再有疏虞至此次鎮江師船擊沈賊船多隻我兵礮船亦不免爲賊擊壞尙未能大加剿洗本日怡良奏吳健彰熟習夷情未可遠離上海著向榮等迅催麟桂李德麟等會齊上下游艇船趕緊肅清江路則鎮江賊勢自孤至金陵爲大局所關克復尤不可再遲該大臣旣選擇勁兵瀝血誓破此賊將弁自踊躍用命人思敵愾務期設法迅速克復二城則餘匪必

皆膽破若再遷延致令首逆潰圍而出國法具在斷難再加寬宥
此次攻城奮勇陣亡弁兵彭得標等深堪憫惻著卽查明請卹以
示激勸將此由六百里諭知向榮許乃釗並傳諭彭玉雯知之○
兩江總督怡良奏亞美里駕國公使馬沙利面交文書並聲稱帶
有國書欲求呈遞已在崑山相見並將所遞書拆封進呈係新換
公使仍求和好照常貿易准令入覲等語諭飭吳健彰堅持定議
妥爲開導○向榮等奏疊次攻城及鎮江師船接仗情形得旨不
克金陵大局不定向榮等激發天良鼓勵將士於夏末秋初之際
務期克復堅城生獲兇渠若稍耽延國法實難再宥也○己丑諭
軍機大臣等戶部議奏度支萬分窘迫軍餉無款可籌密陳情形
一摺覽奏實深焦灼國家經費有常自道光二十年以後卽已日
形短絀近復軍興三載糜餉已至二千九百六十三萬餘兩部庫

之款原以各省爲來源乃地丁多不足額稅課竟存虛名朕軫念時艱特發內帑數百萬金並命部臣等豫籌經費擬定條款頒行各直省酌量試行迄今數月覆奏者甚屬寥寥在督撫不過因事非易辦諉之部臣抑思部臣籌款豈能不取給外省耶卽如各路糧臺需餉孔亟部撥各款該省旣不能剋期起解而遇事輒復請撥鄰省款項徒託空言見在部庫僅存正項待支銀二十二萬七千餘兩七月分應發兵餉尙多不敷而三城尙未克復賊勢日見蔓延若不及早籌維豈能以有限之帑金供無窮之軍餉乎本日已嚴諭琦善向榮速圖攻剿以節糜費特再申諭各直省督撫大吏其各就本省地方情形力籌濟時之策權宜變通其勢不得不然惟須得人經理自有實效豈可坐視大局渙散一籌莫展戶部見行之官銀票招商分設官錢鋪俾官兵領票易銀並購買銅斤

添鑄鼓鑄制錢之外加鑄大錢以爲票本京師試行頗有實際已飭戶部妥議章程迅速通行各省辦理各督撫大吏具有天良覩此支絀情形豈不思爲朕分憂耶戶部原摺鈔給閱看勿庸宣示仍將見在如何籌辦之處迅速覆奏將此由五百里各諭令知之○諭本日據戶部奏自廣西用兵以來奏撥軍餉及各省截留籌解已至二千九百六十三萬餘兩各省地丁鹽課以及關稅捐輸無不日形支絀見在銀庫正項待支銀僅存二十二萬七千餘兩等語覽奏各情實深焦灼逆匪竄踞江甯揚州鎮江經朕特派琦善向榮督兵進剿乃數月以來不但不能收復而江面賊船竄至南昌浦口之賊擾及皖豫致江北各省紛紛調兵防剿國家經費有常安能以有限之帑金供無窮之軍餉推原其故總由該大臣等不能及早克復三城以致糜餉勞師無所底止若再遷延時日

國家大勢將不堪設想琦善向榮皆獲罪之員經朕棄瑕錄用亦當知感知愧奮激圖功豈竟坐擁重兵置國計民生於不問耶著琦善向榮等仍遵疊次嚴旨期限迅圖克復三城儻再觀望不前朕惟執法從事決不寬貸戶部摺著鈔給閱看毋許宣示該大臣等具有天良覩此拮据情形亦當爲朕分憂也將此由六百里各諭令知之○諭王履謙長臻奏探聞賊匪圍攻懷慶勢甚猖獗並將城外所蓄沁水勾結土人盡行放洩等語懷慶爲河北要地太行門戶素稱繁庶之區若任賊盤踞擄掠西竄澤潞踞險負隅勢將繞出直隸腹地且逼近衛輝若由衛河入天津勢甚便捷亦不可不急爲防範該大臣前經派往之董占元等諒早趕到托明阿等統兵四千亦早渡河何以至今尙無進剿信息本日據李德奏統帶官兵親赴懷慶一帶會剿封疆大吏必應如此不分畛域見

在恩華隨營兵一千餘名並該大臣續派之雙祿等此時計均赴懷郡兵力不爲不厚著恩華托明阿等卽會同李德督飭官兵與董占元等併力攻擊速解懷慶之圍萬不可任賊分竄其衛河一帶爲入天津之路該大臣亦當設法豫爲堵截張集馨駐紮廟工著卽相機妥爲布置總之河北一帶肅清則直隸山東山西等省均可安靜無事況渡河之賊半係裹脅乘其奔竄未定之時合力圍攻不難一鼓殄滅兵貴神速該大臣等務當剋期埽除毋得稍有延緩致誤事機將此由六百里諭知訥爾經額恩華托明阿並傳諭張集馨知之○諭李德奏遵旨統率官兵親赴懷慶一帶會剿賊匪並派署遊擊張遇祥武殿魁等督帶兵勇馳赴懷慶聽候相機進剿一面咨會直隸河南剋期進攻等語此股賊匪半多裹脅乘其奔竄未定之時協力兜剿不難一鼓殲除該撫不分畛域

親自督兵出境會剿所辦甚合機宜其曹縣一帶已據札飭鎮道嚴密巡防瑞昌見駐濮州相離不遠聲勢自必聯絡該撫見已出境惟有探聞賊蹤所在進兵攻擊所有渡河賊匪聞已竄至懷慶偪近澤州著卽會同統兵各大員四面截擊勿使竄入太行致成負隅之勢其大河以南已責成陸應穀等帶兵搜捕矣將此由六百里諭令知之○科布多幫辦大臣輯瑞奏敬謹愚惴一摺得旨汝原讀書少雖援引失當朕亦不肯切責見今時勢之艱非任其事者不知其艱內外大小臣工皆係朕量材器用汝但言得人爲要然不知識人之難也汝亦係棄瑕錄用之人旣出此言必能保朕用汝之顏面其勉爲之汝雖未多讀書然滿洲人差使甚多隨處皆可效力盡心斷不可以此爲恨朕猶記汝兄耆英在道光三十年間見面時屢請開缺伊曾奏曰宰相須用讀書人是亦伊之

見短處也○永定河決○辛卯諭內閣福濟奏革員隨營效力請旨遵行等語已革漕運總督楊殿邦已革前任兩淮鹽運使明倫均著畱於福濟軍營差委○諭陸應穀奏遵旨酌保守城出力文武員弁懇請鼓勵一摺逆匪分股竄撲開封省城經該地方文武各員登陴固守迅解重圍見據該撫開單保奏朕詳加披閱其所保人數雖未免過多擬請恩施亦有過優之處惟念近來失事多由地方文武聞風逃散致令逆匪竄踞如入無人之境該地方官幾不知守土爲何事思之實堪痛恨此次攻撲汴梁之賊該城文武員弁俱能協力同心率同紳民練勇奮力抵禦仰賴 神威助佑轉危爲安可見眾志成城足資保障自應從優獎敘以爲守土者勸其歸德等處失守城池及被賊竄擾各地方文武員弁著該撫迅卽查明嚴參治罪庶使奮勉立功者得邀破格之恩而守禦

不力者亦斷難逃憲典也○諭陸應穀奏官兵追賊獲勝許州解圍一摺賊匪圍攻許州經該州知州金梁帶同兵丁登陣固守開放槍礮斃賊多名該州手被槍傷經文岱柏山王家琳等先後馳至賊匪聞大兵追及解圍南竄柏山率領將弁追至鄆城縣王店地方復經遊擊伊里綱阿督兵鈔出賊後殲擒多名見在該撫已飭總兵柏山馳往窮追並著督飭經文岱王家琳等迅將此股賊匪悉數殲滅毋令再有竄逸其懷慶一帶各路官兵雲集勝保見亦渡河會剿諒此股賊匪不難指日殲除該統兵大臣等務當迅速奏功俾大河南北一律肅清以慰朕望○諭軍機大臣等朕聞揚城賊匪每日止有南門出入取水取菜鈔關徐凝門亦閒或一開近日賊中火藥不足放礮甚少油燭已盡惟存糧尙多水道未斷以致賊勢雖蹙郡城尙難攻復逆匪竄踞揚城已將四月果能

將其接濟之路處處斷絕叢爾孤城斷無不內潰之理見在琦善陳金綬大兵多在西北兩面福濟等所派兵勇亦偏近東北惟雷以誠所駐之萬福橋稍近東南其由南門下通瓜州之路僅恃福楸所帶兵勇及虹橋紳董防守未免較形單弱況自九月二十五日接仗之後該處紳董難保不挫動銳氣前次琦善奏報有該逆暗差奸細勾通瓜州之賊搶占虹橋從三汊河直抵揚州南門與城中逆賊接應之語可見賊所注意者全在暗通江路而我之不能迅復揚城亦總由江路未能扼斷是南路一軍所關綦重至江浦六合儀徵皆爲揚城西面要衝賊若被攻窮蹙欲下合金陵大股固須由此奔竄卽金陵之賊欲上竄皖豫亦必從此經過六合見有德崇額等所帶吉林官兵並瞿騰龍帶兵駐守浦口亦有開隆阿武慶督兵防禦亟應認真堵截無任一匪闌入則西路之接

濟可斷西南兩路俱絕則大兵併力專攻東北克復揚城始能杜
其他竄慧成自抵清江後至今未見奏報不知見在行抵何處豐
北壩工見復續有漫塌黃河下游必已斷流儻賊中聞此信息潰
圍突出竟竄清江亦不可不先爲防備著卽知照周天爵奕經楊
以增等一體嚴防仍知會李嘉端等防其續竄滁鳳援應河南之
賊務使四面合圍俾城破之後不任一賊竄逸方爲盡善又聞揚
州西北南三門均難攻破其鈔關徐凝門缺口東關便益門天甯
廣儲等門沿城從南北河下起至便益園田等處該逆不能盡行
防守避堅攻瑕亦係行軍要訣既有城身單薄之處卽可設法由
此進攻或用礮轟擊或暗通內應但須偵探明確因地相機設法
進取窮寇孤城自不難於迅克也將此由六百里諭令知之○王
辰諭軍機大臣等訥爾經額奏續派官兵馳赴懷慶並移營彰德

一摺賊匪攻撲懷慶已經旬日各路進剿官兵馳抵河北者不下
萬餘亟應迅速會剿乘其蟻聚懷郡一鼓殲除方不至再滋蔓延
昨據哈芬奏探聞賊匪盤踞澤州隘口者三千餘人本日訥爾經
額奏攻城賊匪約有五六千人其屯聚司馬集時鄉民卽能圍
攻人數自不甚多乃數日間嘯聚至數千之眾可見進兵稍遲則
裹脅愈甚剿辦更難得手該大臣見已馳赴彰德居中調度並派
蘓秀伊綿阿等馳往會同鎮將等卽日進攻自應如此辦理著卽
知照恩華托明阿等督飭帶兵各員迅速進剿切勿再有延誤致
令紛竄據奏擬令慧成駐紮衛輝以防賊匪潰竄見在慧成行抵
何處著卽飛催進行毋稍遲延該大臣如須督兵前進仍著隨時
調度軍務情形旦夕不同萬不可延緩貽誤董占元已降旨薄懲
卽傳旨該鎮若再不改惡習恐軍法難倖逃也將此由五百里諭

令知之○以帶兵遷延摘直隸大名鎮總兵官董占元頂帶下部
議處○癸巳諭內閣御史福善奏奸商剋扣請旨嚴禁一摺見在
戶部設立官錢鋪兌放八旗軍餉必須嚴除積弊方可取信於民
若如該御史所奏官錢鋪散放兵餉任意扣折攬用小錢並該鋪
商人強橫異常不准取錢人詳細點數等情殊非設立官鋪使民
利用之本意著戶部派員實力稽查官鋪商人如有扣折剝削及
攬用小錢情弊立即嚴行懲辦並於各官鋪出示曉諭以杜奸欺
儻取錢人等故意挑斥爲難亦著一併查究○諭文瑞奏豐工復
蟄請勒限賠修一摺南河每歲工需數百萬兩楊以增身任河督
數載於茲應如何撙節慎防以期帑不虛糜工歸實用乃豐北決
口本年二月方報蔽工未經伏汛新工卽有蟄動總由該河督不
能實力稽查承辦各員辦理草率所致前已降旨將楊以增革職

仍留督辦河工所有此次豐北應修工程楊以增及承辦工段各員著於例賠之外加倍罰賠以儆玩泄另片奏參江蘇臬司查文經請一併罰賠等語查文經雖已離工次其從前督辦草率咎實難辭著拔去花翎仍交部議處○諭王懿德奏閩省上下四路剿賊獲勝並收復縣城一摺據稱署延建邵道胡應泰署參將李煌帶兵五百名鄉勇三百名五月十九日行至沙縣鎮頭地方卽有永安逆匪二千餘名設伏闌截該護道等督兵勦殺二三百名直抵城下城中先行探至典史江宿海商同紳士糾集義勇殺賊開城迎接我兵進城已潰之賊復聚攻城署參將李煌殲斃紅袍賊首一名執旗舞刀賊目十一名餘賊三百餘名生擒賊目姚興等五名就地正法奪回印信一顆旗幟槍礮器械不計其數我兵並無傷損又護興泉永道來錫蕃署參將韓嘉謨與總兵郭仁布在

同安縣會剿賊眾繞路直犯縣城該鎮出城攻剿共斃賊目二名
餘匪二百餘名賊始敗退其廈門之賊經來錫蕃知會水師提督
施得高護金門鎮總兵孫鼎鼐各項師船至浯尾地方擊沈大號
匪船二隻小船一隻奪獲三桅大船一隻斃賊三百餘名受傷溺
斃者二百餘名生擒偽軍師陳金一名餘匪十名搜獲偽印一顆
大礮銅礮旗幟多件至永春州所屬大田德化二縣先後失守大
田先經收復知縣李文照患病該匪乘虛復擾兩次占城該縣被
戕經教諭鄒鴻鏞等糾眾殺賊收復縣城該署州崔洲亦同陸路
遊擊恩需各領兵勇驅除德化縣逆匪將縣城收復等語福建延
平府屬沙縣永安二縣汛先後失守該地方文武員弁均有應得
之咎惟念該員弁等接拏賊黨連獲勝仗立將沙縣永安縣同時
收復功過尙屬相抵所有護延建邵道胡應泰署延平協副將李

壽春署延平府知府毛健失察處分均著加恩寬免此外在事出力人員著該署督據實保奏其失守員弁並卽查明參辦○諭訥爾經額托明阿奏攻剿懷慶城外賊匪大獲勝仗一摺據稱托明阿會同提督善祿已革都統西凌阿督兵渡沁河分三路進剿該匪亦分三路由東南北三面城廂繞出抗拒我兵奮勇前進施放連環擡槍擡礮迎擊自己至申斃賊七八百名沁河隄北之賊亦擊斃二百餘名共殺賊一千餘名內有黃巾黃袍賊目二名執令旗賊一名據生擒長髮賊供指卽係賊首僞丞相吉文元等語此次賊撲懷慶府城該城文武官員尙能登陴擊賊以待援兵不負守土之職托明阿督兵渡河卽會同善祿西凌阿首先奮勇殲厥渠魁大挫賊鋒甚屬可嘉見在托明阿善祿董占元雙祿等分兵三路夾擊訥爾經額已飭署河北鎮總兵花里雅遜布等在扼要

隘口闌截防其奔竄恩華勝保李德卽日趕到正可督兵接應四面兜擒此股賊匪諒無難剋日掃除該大臣等不可以已獲勝仗稍存大意其各鼓勵軍心迅速蒞功同膺懋賞朕有厚望焉○江西巡撫張芾奏賊於城北得勝門外暗挖地道江忠源在城內加築月城由章江門界至得勝門樓止計一百二十餘丈復於得勝門老月城內開掘深濠安設甕聽以杜轟塌之患復派兵勇縋城往焚文孝廟賊巢據擒賊供稱江南賊尙有數千將至該逆又於永和得勝兩門外高坡上連紮三營分股在各門攻擾均經守陣兵勇開放槍礮擊退並派兵下城追擊先後斃賊百餘生擒七十六名正法此五月二十一日至六月初一日辦理守禦及擊賊之大概情形也參將羅玉斌於二十八日帶兵來省江忠源與臣等密商派令楚勇川勇九江鎮兵並已革臬司徐思莊督糧道鄧仁

堃所練各勇由城西順化門出隊分三路進攻另派兵勇百餘名
交守備封九貴督帶由章江門下城往燒賊壘賊船江忠源督同
知府林福祥知縣馬永熾統帶練勇在城外高處策應臣與臣陳
孚恩在城上督陣復派藩司陸元烺臬司惲光宸道員吳其泰鄧
仁堃王訓沈濤等分守各門三路兵勇將近賊營該逆從營中施
放大礮徐思莊練勇直撲賊營該逆突出數千人練勇向前迎擊
斃賊多名因賊匪愈聚愈多經臣與臣陳孚恩在城督飭知府耆
齡遊擊祥麟看準賊隊各親點大礮轟斃賊匪多名內有執黃旗
賊目一名賊眾稍卻復又回撲適九江兵楚勇川勇及南昌府勇
三面接應合力抵禦鏖戰二時之久將賊擊退守備封九貴所帶
兵勇由章江門下城各帶火罐火箭欲焚賊壘賊船該逆突出二
三百人冒死抗拒兵勇奮力向前斃賊數十名遊擊常海在城上

督率浙江兵丁開放槍礮斃賊亦多此初二日出城接仗之情形也據湖口縣稟稱續到賊船百餘隻見雖續募壯勇一二十人止能幫同守陣於攻戰殊無把握卽省城可保無虞該逆必又竄往他處請飭催向榮及湖廣督撫撥兵前來但得精銳五千人卽可將此賊撲滅又奏六月初四日辰刻該逆用地雷於得勝門西月城外轟塌城牆六丈有餘逆匪蠡擁而上經江忠源帶同伊弟忠濟督率楚勇首先擊退_臣等及文武員弁卽飭兵勇人夫等竭一晝夜之力趕緊搶築藉資保護上諭逆匪攻撲南昌經張芾陳孚恩江忠源等督率兵勇縋城殺賊疊獲勝仗江忠源所帶楚勇尤能勇往出力江忠源著賞給白玉翎管一支白玉四喜搬指一箇所有在事出力之文武員弁紳民兵勇著該撫覈實查明先行保奏以昭激勸見在向榮已派鎮將大員帶兵馳赴江西並湖北

湖南各督撫亦派撥將弁兵勇前往助剿指日大兵雲集蠢茲醜類不難剋日蕩平也○諭軍機大臣等葉名琛奏剿辦湖南交界匪徒獲勝並嚴防江西匪黨竄逸一摺湖南郴桂一帶毗連廣東南韶連各屬有匪徒數百紛竄滋擾經該督會同提督崑壽派委文武員弁探蹤堵剿疊次殲擒賊匪多名餘匪四散逃逸難保不復行糾聚廣東與湖南江西接壤之區隨處可通著葉名琛仍嚴飭各委員協同該地方官實力查拏務期翦除淨盡至所稱江西匪徒竄入湖南桂東縣境內屯聚桂陽縣復有另股匪徒肆擾見飭南韶連鎮道督率所屬團練鄉勇並著遴派幹員馳赴交界地方協剿其江西龍南信豐各匪尙未殲除防範尤爲緊要毋使闌入粵境所有交界各要隘惟當一體嚴防兜捕毋稍疏懈近來粵洋匪船出沒經各鎮將派帶舟師捕拏盜犯二百五十餘名尙有

外來匪船竄入伺劫著該督飭令該鎮將等督派弁兵趕緊追捕以清洋面前據該督奏稱雇備紅單船二十隻於五月二十一日啟程駛赴江南刻下江南剿匪正在喫緊此項船隻已否全數開行著催令迅往應用本日據王懿德奏剿辦閩省會匪請飭催粵兵馳往援應並著葉名琛卽飭前調官兵迅速趨行由漳州一路進發聽候王懿德調遣毋得延緩貽誤將此由六百里諭令知之○諭張芾奏守禦事宜並與賊匪接仗情形各摺片賊情變詐百出仍須加意嚴防且據湖口縣報稱又有續到賊船百隻賊匪日增而守城兵勇相持日久又恐各有懈心前據向榮奏已派總兵音德布帶兵一千二百名於六月初七日啟行前赴江西其湖南湖北各路援兵諒均不日可到該撫惟當激勵在事文武兵勇竭力守禦援兵一到更可內外夾擊將此股賊匪剋期殄滅至見擾

江西之賊首係何姓名賊眾究有若干是否洪逆分股抑係金陵遣散之楚匪另股分擾見有生擒賊黨著卽訊明具奏再該撫近來奏報到京甚屬遲滯自係因道路梗塞所致其應如何繞道驛遞迅速之處並著酌量辦理將此由六百里加緊諭知張芾並傳諭陳孚恩江忠源知之○大學士直隸總督訥爾經額等奏剿賊大獲勝仗得旨渡河逆匪受此剿戮事機庶可挽回朕泣感天恩深厚嘉爾諸將士奮勇爭先然此時朕不敢稍萌輕易之心訥爾經額等尤不可稍存大意畿輔安危實天下安危所繫卿等其鼓勵軍心以期埽數殲滅○甲午諭軍機大臣等李嘉端奏縷陳江中賊情亟宜籌防及接琦善咨防賊分竄各摺片據稱江面時有賊船乘間四出搶米接濟欲保地方困賊匪非嚴防江面不可覓飭各州縣整頓鄉勇遇賊併力合剿並於練勇內挑選精壯可

得二千人再購大礮數十座分守東西梁山又咨副都統雙成仍在滁州關山一帶嚴守調前署鳳陽縣黃元吉帶勇由巢縣含山迎剿金陵鎮江逸匪等語已諭令琦善向榮等迅籌攻剿並飭向榮於廣東續雇之紅單船到江時提赴上游與下游艇船合力夾擊矣逆匪竄擾豫省攻撲郡縣見經訥爾經額派委鎮將與托明阿之兵合力剿擊將河北懷慶城外之賊痛加剿洗河南許州之賊亦經柏山等擊退餘黨由西平一帶逃竄難保不復行竄回皖省交界防剿最關緊要周天爵見駐徐宿一帶設或該逆竄至附近地方必當竭力督剿並著李嘉端督同總兵玉山迅撥兵勇扼守要隘毋稍疏懈至該撫所稱金陵鎮江賊匪欲赴六合報讎雖未可盡信仍當隨時確探周密籌防萬勿稍涉大意將此由六百里諭知周天爵李嘉端並傳諭玉山知之○諭據李嘉端奏採訪

賊情一摺逆匪分踞三城屢次諭令該大臣等設法收復並杜賊分竄之路乃數月以來均以進攻未能得手爲詞且任賊分股北擾河南復有賊船上竄江西圍撲省城本日據李嘉端奏盤獲奸細楊恩海一名訊隨賊首楊秀青自江甯竄至江西被官兵殺敗差周文邦回江甯邀賊助戰又該撫於五月內曾風聞楊秀青於十四日潛已上船以粵東寄籍金陵之人僭封僞王以圖影射與奸細供詞似相符合逆情詭譎異常如果楊秀青已離金陵故畱餘匪在城牽掣大兵豈不又墮奸計且鎮江揚州城內逆首被圍日久亦恐乘閒潛出爲竄擾他處之計並聞該逆匪假冒官兵號衣希圖溷迹琦善向榮等頓兵城下於城內賊情虛實自必隨時偵探但恐師老力懈竟令賊首潰圍而出又蹈從前覆轍該大臣何以對朕耶至賊匪分撥一萬二千人前赴六合報讎之說雖未

可盡信亦不可不豫爲防範見在黃河南北股匪已屢被官兵擊敗其江南大股逆匪難保不續由江浦一帶北竄以爲豫匪接應總之江面不靖則逆匪得以往來自如處處可到防剿諸形棘手所有下游艇船得力者僅數十隻止能防其一面前調廣東紅單船此時諒已趕到卽著向榮相機調赴上游扼要處所堵賊上竄之路其下游一帶卽責成麟桂會同水陸提鎮大員鄧紹良等設法先將鎮江剋期收復翦其羽翼則賊勢自孤其著名首逆如楊秀青等是否已離江甯著向榮確切訪探卽一面嚴飭鎮將兵勇奮力攻擊迅圖克復至江北要口前據琦善奏稱已派瞿騰龍帶兵二千協同吉林官兵駐紮堵禦著卽隨時督飭加意嚴防毋稍疏懈麟桂見署江甯布政使著仍督帶礮船會同水師鎮將相機攻剿舟中儘可辦理地方公事並可與鄧紹良隨時知照水陸夾

攻毋庸移紮丹徒轉致不能兼顧也將此由六百里諭知琦善向榮陳金綬雷以誠許乃釗並諭知鄧紹良傳諭麟桂知之○予安徽殉節訓導吳耀文祭葬世職○乙未諭內閣賈楨奏紳士團練緝獲土匪請飭地方官究辦一摺山東黃縣東鄉地方土匪張九仔等糾眾結盟聚黨至八十餘人之多經該處團練局會同營弁設法緝拏張九仔等六犯送縣究辦此種土匪聚集多人不法已極既經拏獲卽應迅速懲辦何以該縣懸宕二十餘日並不嚴加鞫訊著該撫派幹員前往將拏獲各犯提訊明確就地正法以儆兇頑並查明該縣延玩情形有無吏役人等從中徇庇一併參奏其未獲各夥犯仍著該地方官協同團練紳士嚴拏務獲毋任一名漏網○諭陸應穀奏官兵追賊大獲勝仗南竄股匪殲戮將盡一摺該逆竄入遂平縣城經柏山督兵緊追至城南兩路埋伏大

隊官兵乘夜圍繞城北一帶連放大礮該匪聞礮棄城南竄至沙河北岸伏兵齊起槍礮並施柏山知賊陷伏中卽督大兵齊進該逆抵死抗拒我兵奮勇爭先無不一以當百賊匪紛紛投河淹死者不計其數殺斃長髮賊二百餘名餘黨三百餘名並砍殺僞丞相李姓復進城按斬數十人總兵經文岱帶同遊擊全喜都司蘇林趕至遂平復分投按獲二十餘名立時正法此股逆匪業已剿戮殆盡惟未經接仗之先尙有偷渡沙河零匪及王家琳在西平所遇之賊亦有逃竄該撫仍當嚴飭鎮將員弁迅速掩捕務期悉數殲除毋畱餘孽柏山奮勇直前三獲勝仗甚屬可嘉著加恩賞戴花翎其在事出力員弁並著陸應穀酌量保奏候朕施恩毋許冒濫○江西巡撫張芾奏逆匪於六月初四日用地雷轟塌得勝門西城牆當經江忠源等擊退查所塌城垣除坐墊塌卸六丈有

奇兩旁賊裂各三四丈當逆匪轟放地雷之時聲震一城黑煙迷目該逆等擁而上約數千人臣等聞報趕至時江忠源與伊弟江忠濟立即督令楚勇奮力搶護該逆復用火箭槍礮向城內施放子密如雨楚勇頭目唐邦興陳周呂等站立缺口指揮眾勇冒死拒敵鏖戰一時殺賊無數並斃身穿黃衣手執黃旗頭目數名賊方少卻楚勇乘勢壓下該逆抵敵不住敗入屋內楚勇林立城下拒住逆匪臣與陳孚恩督率文武員弁趕將缺口搶築高約七八尺始令楚勇撤回城內連夜修築至初五日將缺口及賊裂之處一律築補得以化險爲平當犇城時逆匪復分股攻撲各門經先派藩司陸元烺等暨已革臬司徐思莊戶部郎中陳景謨主事汪茹鑑等會同在城員弁在各門分段守禦均經嚴督兵勇將各股逆匪一併擊退鄧仁堃林福祥首先趕至缺口躬冒矢石督

率搶築尤爲出力合計是日各處約斃賊五六百人是役首先搶護之功楚勇爲最江忠源調度有方又能先事豫防伊弟忠濟不避鋒鏑洵屬勇敢至首先出力之楚勇及協同卻敵各兵勇由臣分別從重給賞江忠源據稱不敢仰邀議敘職員江忠濟可否請旨賞給五品頂帶花翎出自鴻慈應敘員弁勇目另繕清單恭呈御覽惟是逆匪日聚日多詭謀百出此次轟塌城垣雖經搶護而外援不至內困甚虞並聞該逆仍暗挖地道尤須設法準備抵禦臣等惟督率在事各員弁晝夜防守上諭內閣據張芾奏賊用地雷轟塌城牆經江忠源等督率楚勇首先擊退是日首先搶護之功楚勇爲最江忠源之弟江忠濟不避鋒鏑尤稱勇敢六品軍功翎頂職員江忠濟著給五品頂帶並賞換花翎袁州營都司景星著賞帶花翎浙江衢州營守備封九貴著以都司儘先補用

湖南藍翎守備李輔朝著賞換花翎楚勇頭目唐邦興著以把總用並賞帶藍翎陳周呂著賞帶藍翎李德極著以千總用並賞帶藍翎楊寶川戴利行夏春潮均著以把總用朱維德著以外委用仍著該撫會同陳孚恩江忠源督飭文武員弁激勵紳民練勇迅將賊匪撲滅保衛省城遇有出力尤著之員隨時查明先行保奏候朕施恩○向榮許乃釗奏提督鄧紹良稟六月初九至十二等日該逆晝夜攻撲營盤均被官兵擊退斬獲甚多詎於十四日接據統帶四川官兵之副將瑞格遊擊周兆熊等稟報十三日賊匪突於焦山一帶將湖南及各處營盤盡行踏去瑞格等隨卽飛帶四川貴州官兵趕往接應賊已分股由都天廟前來打仗直至酉刻賊方遁去我兵收隊回營惟所帶僅四川兵一千名貴州兵五百名營盤偏近南門孤軍難以久駐是以暗將營盤退紮馬陵請

添兵前來救援提臣鄧紹良見在丹徒鎮收集散兵等語臣等查逆匪連日撲營均被官兵擊退各營盤緊逼鎮城屯紮當不至漫無準備何以是日經賊攻撲輒被占踞營盤至焦山在大江之中賊由焦山突出尤不可解至鄧紹良所帶湖南各兵既退駐丹徒其四川貴州營盤孤軍無援不能不退往馬陵駐紮該處爲蘇常門戶亟須勁兵往援方免搖動臣等派總兵和春統帶廣東兵一千五百名湖南兵八百名馳往應援以固蘇常下游門戶鄧紹良駐鎮江日久未能克復咎已難辭乃並營盤亦不能自固致被逆賊襲占實屬孤恩溺職請旨將江南提督鄧紹良先行革職治罪或仍畱於軍營效力贖罪至鄧紹良所帶弁兵銳氣已挫畱於鎮江亦屬無益應酌量撤回大營督飭各將弁調練振作以鼓其氣下游師艇各船一時無陸路接應亦恐單薄仍責成總兵李德麟

藩司麟桂嚴督兵勇小心防範並咨會督臣怡良嚴飭蘇常各屬

文武會督紳士率同團練民勇一體防範上諭軍機大臣等向

榮許乃釗奏鎮江官兵接仗失利趕派大員帶兵赴援請將提督

革職治罪一摺覽奏竇深憤懣鄧紹良身膺專閫付以克復重任

平素尙屬勇敢何以如此潰敗豈受恩超擢志得意滿以致兵心

渙散耶鄧紹良著先行革職畱於軍營效力至焦山在大江之中

不通陸路該匪由何路衝來情形亦尙未確仍著向榮許乃釗迅

速查明因何失利是否毫無準備爲賊渡江掩襲據實參奏鎮江

爲蘇常屏蔽不可稍有疏虞該大臣派令和春帶兵馳往應援著

卽飭令迅速督剿務將賊匪殲除力圖克復本日已有旨令怡良

前往調度督率提鎮水陸將弁併力進攻並令嚴飭蘇常各屬文

武會督紳士率同團練民勇一體嚴防其下游師艇各船卽飭令

麟桂李德麟嚴督兵勇相機進攻毋稍疏懈至金陵日久未復該大臣見在如何布置儻首逆楊秀青竟已潛竄江西而以堅城牽掣我軍或因官兵圍困稍懈併力奔突而出賊情詭詐異常急須加意防範設法攻剿毋再遷延玩泄致干重罪大營糧餉向由江西支應見因南昌被圍未能兼顧已諭令怡良會同許乃釗先由江蘇就近支應接濟矣將此由六百里加緊各諭令知之○諭張亮基奏見籌擇要防剿並分兵援應江西一摺據稱廣濟縣之田家鎮對面有半面山壁立江心江流最狹該署督擬於該處安設木筏大礮防賊鈔襲並可兼顧南北兩岸辦理尙屬得宜至南昌見尙被圍該省居閩浙皖楚之中其地最關緊要萬不可稍有疏虞該署督已分撥兵勇及招集廣勇等共二千餘名馳赴該省著卽趕緊催令星夜趲行無稍遲延所請將黃州副將張金甲帶赴

江西著准其馳往軍前戴罪自效至襄陽樊城等處與河南接壤
卽著阿勒經阿隨同台湧嚴密設防惟該署督見已回省署提督
復回襄陽其下游江防專責該署道府接辦是否可以放心仍著
隨時體察情形相機策應無稍大意本日據陸應穀奏南陽鎮柏
山追賊至遂平連日大獲勝仗南竄股匪計將殲除殆盡餘匪
闖入湖北仍當迅速堵擊勿令滋蔓又據蔣霽遠奏已選精兵二
千名派得力鎮將帶赴湖南見在計已到楚該省防堵之兵不至
單薄前有旨諭令調赴江西之鎮筸兵八百名湘鄉練勇數百名
並著迅催星速援應南昌被圍情形萬分喫緊專望兩楚援兵切
勿延誤該署督另片奏請差委需人已降旨令吏兵二部揀發各
員候旨發往該省矣將此由六百里諭令知之○諭張芾奏楚勇
搶護省城出力一摺此次賊匪轟塌城牆乘勢搶撲該楚勇等能

於倉卒之間奮勇搶護俾城內得以趕緊修築在城紳士徐思莊
陳景謨汪茹鑑等亦能會同文武分段守禦斃賊多名均屬奮勇
可嘉見在向榮所派音德布帶往赴援之兵計已趕到本日張亮
基奏已飭都司戴文闌管帶湖北兵一千名廣勇五百名川勇五
百名星夜馳往又據蔣爵遠奏已撥貴州兵二千名前赴湖南亦
經諭令張亮基即將前調之湖南鎮筵鎮兵及湘鄉練勇催赴江
西合計援兵已不爲少該撫仍當會同陳孚恩江忠源督飭兵勇
激勵紳民一面設法守禦一面出城夾擊以期迅解重圍毋令竄
擾他處另片奏南康失守及湖口彭澤賊匪經過各情形南康濱
臨鄱湖爲由江入省必由之路湖口彭澤亦皆逼近江濱前此張
芾奏報賊撲省城之時朕卽疑其沿途何以並無阻滯特降諭旨
令其查明沿江一帶有不無失事今覽所奏南康果有失守情事湖

口彭澤兩縣雖據稟稱並未失守而兵丁既有陣亡衙署均有燒毀難保非賊船上竄後飾詞稟報署知府恭安又未有存亡確信可見江面備禦之疏省城偵探之懈著該撫卽行確切查明據實具奏毋許稍有含混該撫所請從重治罪之處著俟省城圍解之後再降諭旨至所稱向榮軍營糧餉請飭江蘇浙江接濟等語已諭怡良許乃釗妥爲籌辦江南軍營兵餉以廣東爲大宗惟有江西取道最便若該省賊氛迅掃道路無阻仍應照舊辦理以歸畫一將此由六百里諭知張芾並諭陳孚恩江忠源知之○以八旗漢軍兵丁添演槍操加賞銀二千四百兩○丙申諭內閣前據御史隆慶奏保琦忠等四員請發往直隸差委一摺除琦忠革職之案朕所深悉無庸覆查外降旨令兵部將文興常安順保等三員離任原案查明並令該部帶領引見該員等或係海疆告病或因

病回旗見已年老或因案革職於查辦廢員案內賞給藍翎侍衛
即使發往直隸於該處軍務亦未必遽有裨益所有已革吉林副
都統琦忠前任福建漳州鎮總兵文興前任雲南臨元鎮總兵常
安藍翎侍衛前任江南狼山鎮總兵順保均著無庸發往琦忠等
均係曾任二品大員如果才堪驅策朕心自有權衡非如微末人
員其才具無由上達者可比何必臚列薦章希圖起廢錄用致開
倖進之門耶○諭前因被兵省分地方官先將家屬移徙出城以
致士民紛紛遷避特降諭旨通行曉諭各該地方官自應恪遵諭
旨鎮靜撫綏以期固結人心保守疆圉本日有人奏近賊各省會
府縣地方仍有官吏先搬眷屬致令紳士商民遷徙不能禁止者
似此遇事張皇何以為民保障見在河南賊匪漸就肅清河北竄
擾餘匪疊受懲創其鄰近之直隸山東山西陝西等省防堵綦嚴

自不至再有分竄各該省士民等諒能自安生業共衛鄉閭著再
申諭各督撫如地方官仍有遷徙眷屬以致搖惑民心者卽行查
明嚴參懲辦毋得扶同徇飾致干重咎懷之○諭兵部等衙門奏
遵查安徽亳州失守文武請分別議處議卹一摺壽春鎮總兵王
山身膺專閫禦侮保民是其專責乃於所屬汛地被賊鼠擾實屬
有乖職守潁州府知府毛含昱雖不同城於屬州失守咎亦難辭
玉山毛含昱著革職仍各畱於本任責令辦理防剿事務以觀後
效其臨陣遇害之署亳州知州試用直隸州州判孫椿爲國捐軀
殊堪憫惻著照部議從優賜卹以慰忠魂○諭刑部奏遵議安徽
省城失守文武各員分別定擬一摺已革安徽藩司李本仁以二
品大員先經奏明在省守禦不能妥爲布置以致失陷城池自應
從重問擬著照部議定爲斬監候秋後處決已革臬司張熙宇已

革署安慶協副將賡音泰防守小孤山賊船竄至開礮打仗兵丁旋卽潰散實屬防堵不力均著從重發往新疆效力贖罪張熙宇賡音泰仍著畱於安徽戴罪自效已革署潛山營遊擊德成與賊接仗身受重傷雖係失事之員尙無退縮情事業已革職著無庸議○諭刑部奏遵議安慶退守之文武員罪名一摺已革安徽按察使張印塘兼署副將富惠係文武大員署知縣馮元霖係守土之官不能禦賊均著從重發往新疆充當苦差已革前任副將松安係捕盜之員與同城知府已革署知府牛鎮均著從重發往軍臺效力贖罪張印塘富惠馮元霖松安牛鎮仍著畱於安徽責令戴罪自效○以畢承昭爲安徽按察使由浙江甯紹台道遷○丁酉修昌西陵橋岸等工○以唐樹義署湖北按察使前任湖北布政使○戊戌琦善等奏臣等攻剿揚城浹旬以來無計不施而賊眾城堅難期得

手漕臣福濟以揚城東南正臨運河議用糧船裝載兵勇乘流而下直偪城東以船尾本高上用長木支搭接鋪木板冀可魚貫登城定於本月十八日同時爬城東關用糧船上城北面仍用雲梯仰攻適鄖陽鎮瞿騰龍由六合折回臣等因飭該鎮與雙來一同督兵進攻搭橋過河直抵城下賊匪槍礮如雨雙來瞿騰龍身先士卒賈勇向前用擡槍擡礮竭力仰攻斃賊多名賊匪穴城設礮乘高下擊我兵轉戰不退雙來右髀被大礮子打穿經兵丁擡回見在疼痛昏暈趕緊延醫診視據云筋骨已傷能否醫治就痊尙未可定查雙來素稱勇敢能得士心新奉恩旨賞加提督銜益加感奮此次攻城身受重傷尤爲忠勇出力臣等屬其安心調養冀得就痊是日漕臣福濟在東關督帶漕船行抵城下張翊國等帶領壯勇正欲搭板上城適風力過猛水勇等未及掉轉船尾而竹

纔已斷張翊國止得跳下賊匪施放槍礮並將火彈擲下水勇立
時潰散賊復縋城而下縱火焚燬漕船一隻經張翊國等開放槍
礮奮力攻勦殺傷賊匪約六七十人始行退去見在臣等會商必
須另籌良策合力攻勦以圖克復又奏正在繕摺間提督銜甘肅
肅州鎮總兵雙來於本日申刻因傷重出缺該總兵此次來揚力
圖報效勇冠三軍茲以會攻揚城受傷過重遽至不起軍中將士
無不爲之隕涕該總兵家道甚寒僅有一子常山年十八歲並無
官職在京居住其身後事宜臣等妥爲料理該總兵因傷出缺與
臨陣捐軀無異儻蒙 聖恩垂憐以勵士氣而慰忠魂出自逾格
鴻慈又奏虹橋爲揚州至瓜州水陸通衢自鍾淮陣亡後所練民
勇漸形渙散商之漕臣福濟添派漕河兩標弁兵二百餘名並委
知府福祿管帶壯勇四百名駐紮虹橋並委令已革參將文玉都

司宋天麒馳往虹橋幫同福楸防堵又飛咨向榮飭艇船停泊於七號口八號口之間原冀艇船與虹橋兵勇水陸夾攻使賊腹背受敵俾易得手詎料提督鄧紹良在鎮江接仗失利營盤被焚退至丹徒鎮以致艇船不能駛上瓜州之賊聯成一氣進窺虹橋六月十五日突有賊千餘人至虹橋燒燬民房山東官兵施放槍礮斃賊多名嗣因賊至愈多眾寡不敵福楸所帶之勇漕河兩標之兵亦均潰退此次虹橋失利實因該處練勇已散兵力較單所致文王宋天麒十三日甫委赴虹橋且未督帶兵勇應毋庸議臣等仍責令該革員等及閒散旗人書義協同紳士再行籌議設法攻守此外容臣等與福濟查明再行覈辦查該逆由瓜州進至虹橋巢穴益多路徑紛歧處處可通揚城實有難以兼顧之勢三汊河本有防兵臣琦善又添派官兵前往防守其餘東路堵禦事宜臣

雷以誠與福濟設法辦理又奏六月初三四等日有賊船至六合縣之斷要停泊窺伺被兵勇擊退並據變儀使武慶等稟六月十二日浦口來賊船十餘隻經武慶等督率官兵施放火箭燒燬賊船八隻是該逆注意六合等處欲圖北竄軍營督率無人諸事更形棘手不得已仰乞俯准將瞿騰龍帶兵暫畱揚州以資守禦上諭軍機大臣等琦善等奏攻剿情形各摺片逆匪占踞三城屢次諭令該大臣等設法收復乃鄧紹夏在鎮江營盤爲賊掩襲該大臣等會攻揚城仍未得手轉致損兵折將虹橋兵勇又多潰敗似此情形三城何日可復逆匪何日可平朕心實深焦灼昨因鎮江官兵失利恐賊勢愈張江北一帶更形喫重已諭令該大臣酌量將慧成及容照所帶之兵擇要屯紮相機調度今虹橋旣爲賊占揚城與瓜州之賊聯爲一氣難保不潛圖北竄著琦善等遵照

前旨飛咨慧成並行知容照卽將所帶官兵擇要布置以爲大營策應南門一帶應如何設法阻隔賊路虹橋要地仍當激勵該處兵民紳勇併力收復其東路堵禦事宜並著雷以誠與福濟嚴密籌辦務與琦善陳金綬大營聲息相通瞿騰龍及所帶各兵著准其畱於揚州隨同攻剿六合等處及安徽濱江要隘萬不可再有疏虞應如何扼要堵截著琦善體察情形通籌辦理並知照周天爵李嘉端等一體嚴防總之防守江北克復揚城係該大臣等專責今江北之賊已竄至豫省重煩兵力而揚州之賊又將鋌而走險老師糜餉不知身膺統帥者將何以對朕耶將此由六百里加緊各諭令知之○琦善等奏總兵官雙來傷亡得旨雙來何如是不幸旋卽出缺朕隕涕覽奏不勝悲憤然視彼貪生退縮者奚啻霄壤朕卽有恩旨以慰忠魂以勵臣節雙來靈柩回京時專摺馳

奏又奏瓜州揚州賊勢益張實爲可慮批誠然可慮然豈能歇手不辦○予江南傷亡甘肅肅州鎮總兵官雙來祭葬世職如提督例諡忠毅賞銀一千兩治喪○己亥諭內閣訥爾經額恩華奏前隊剿賊獲勝情形一摺賊匪擾及懷慶經恩華派前隊火器營營總烏蘭都等統兵於十八日行抵懷慶府東北距城三十里之清化鎮探知懷慶北路沁丹二河之間賊匪聚集甚眾率領將弁兵丁行抵樂村丹河北岸見隔河樹林內賊匪用礮轟擊斃賊多人火器營官兵施放火箭燒燬賊眾所占房屋數十間外委常山等奮不顧身跳入丹河探路大隊官兵全行渡河槍礮連環攻擊共殲斃紅衣賊目二名賊匪三百餘名生擒十一名此股賊匪已被我兵痛加剿洗見在托明阿善祿西凌阿分路進攻勝保李德亦先後會剿該大臣等著卽督率官兵會同勝保李德迅速兜剿務

將懷慶盤踞賊匪悉數殲除毋稍延緩○諭軍機大臣等訥爾經額恩華奏剿賊獲勝一摺據稱總兵董占元與烏蘭都等同行至懷慶二十里鋪分路董占元由西北小路進攻烏蘭都等由西北大路進攻今烏蘭都既經獲勝其董占元一路同時並進自必亦已得手托明阿善祿等既與該總兵約期出隊想接仗情形續當奏報勝保渡河後既已馳抵該府李德想已趕到各路精兵會合正可將此股賊匪盡數殲除毋令紛竄昨據哈芬奏本月十五夜太行山口有賊匪攻撲經官兵轟退等語是賊聞大兵雲集已作兩竄之計澤潞爲懷慶要隘最關緊要若任賊窮蹙入山則大兵又成尾追之勢該大臣等務當嚴飭官兵四面兜剿聚而殲旃勿畱餘孽恩華另片奏請將蘊秀畱營辦理翼長事務等語蘊秀准其畱於恩華軍營辦理營務毋庸設立翼長名目將此由六百里

各諭令知之○庚子諭內閣福濟奏參進兵遲誤之遊擊等語本月十八日該漕督與琦善同時進攻揚城賊匪署揚州參將河標右營遊擊馮景尼逾時始到其所帶練勇亦未遵令上船實屬遲誤馮景尼著卽革職仍暫畱本任責令戴罪自效儻再不知奮勉卽著嚴參治罪○諭軍機大臣等前據向榮奏鎮江官兵接仗失利當降旨令查明如何失事情形據實參奏本日據麟桂奏稱賊匪數百人由鎮江北門轉至東門直撲陸路大營各營火起官兵同時潰散鄧紹夏移紮丹陽等語是此次鎮江失事該官兵並未與賊接仗其漫無準備可知且各營一時火起難保非奸細內應鄧紹夏久歷行陣何以如此疏失實不可解丹徒鎮爲蘇常緊要門戶經該藩司飛飭地方官豫調潮勇前往埋伏雖於十五日擒斬賊匪多名而十七日該逆擁眾出城潮勇等眾寡不敵旋即退

走其江北虹橋一路亦復被賊焚燒官兵潰散大江南北兩岸陸路可守之處險要旣失使賊匪上聯揚郡下達蘇常則我兵節節被阻而賊蹤路路可通師船停泊江心亦必勢成孤注該大臣等或身爲統帥或職任疆圻豈能坐視逆氛直擾東南一籌莫展向榮所派和春帶往赴援之兵於十五日啟程計期早可趕到此時丹徒鎮是否收復應於何處進攻遏其下竄之路副將瑞格等退駐馬陵之兵尙有一千五百名應如何會合策應怡良接奉前旨定當赴該處督辦著卽迅速進兵水陸嚴防萬不可再有疏失至麟桂所帶水師艇船據奏北固山下有賊設大礮舊處恐難停泊擬調泊丹徒江面自係丹徒鎮未經失利以前之語見在應作何布置亟須妥籌但不可任令艇船散漫退避致陸路援兵到齊水路師船又難應手和春李德麟均有水師之責毋得稍存諉卸糧

臺船隻尤關緊要該藩司既令暫移圖山關下有大舳舨板等船
一同分泊儘可妥爲保護見在師船需餉孔亟著怡良許乃釗源
源籌解毋致潰散向榮軍需糧餉前已諭怡良等於蘇省籌撥運
解此時餉道有無梗阻其繞道行走如何接護並著迅速籌辦廣
東所雇紅單船前據該省奏先於五月二十一日開放二十隻計
一月上下已可駛入江口本日復諭葉名琛等將續雇船隻趕緊
催令出洋此項船隻多係生力水勇會合進剿必能得力一俟入
江卽著和春麟桂李德麟等相機調遣攻剿至十五日擒斬賊匪
各勇經麟桂先行賞給翎頂係爲鼓勵兵心起見自應如此辦理
募勇多非土著未可盡恃而潮勇一項尤當妥爲駕馭稽查彈壓
以防後患該大臣等務須飭諭地方聯絡兵民迅圖克復蘇松爲
財賦重地見當辦理海運若再有疏虞豈能當此重罪耶將此由

六百里加緊諭知向榮怡良許乃釗並諭知和春傳諭麟桂知之
○諭福濟奏揚州東北路兵力單弱請撥兵接濟一摺據奏督帶
兵勇扼守揚城東北兵力甚單請飭令勝保折回灣頭並請撥壽
春鎮兵千餘名等語灣頭係清江鎮鑰自應添兵接濟以期防剿
得力惟勝保已抵豫省渡河會剿懷慶賊匪未便遠道折回安徽
兵力亦單壽春鎮兵能否分撥亦難懸度惟慧成所帶官兵一千
九百餘名及容照所帶官兵均由徐邳一帶水路行走可以就近
截畱著琦善等仍遵前旨分別咨照慧成容照等何路緊要卽將
所帶官兵扼要布置其東北一路亦可添兵策應琦善等與慧成
福濟務當迅速籌辦嚴防賊匪北竄及早克復揚城毋再延誤將
此由六百里加緊各諭令知之○辛丑諭軍機大臣等據戶部奏
請急籌接濟庫款一摺本日已諭令四川山西陝西各督撫遵照

辦理矣。見在部庫存銀不敷支放，自宜迅籌接濟。前議暫停各官養廉，除山西業經覆奏外，其餘省分或咨請起扣，或並未議覆。值此籌款緊急之時，豈容竟置部庫緩急於不顧？著戶部分別行文，迅催奏報，不得任意稽延。至各省見均籌辦捐輸，四川、山、陝、廣東等省見在辦理，想已各有成數。惟需餉孔亟，總宜迅速集事，以備撥解。方有實際。著戶部一併行文各督撫，催令設法籌辦。至殷富之家，如有捐銀多至百萬數十萬者，其急公紓難之忱，卽與統軍奏績無異。五等之封賞，延於世垂諸史冊，立功揚名，何榮如之！其有量力捐貲，暫濟急需者，卽如周祖培所奏，由藩司發給借單，事竣如數給還，仍先予優敘，以示鼓勵。朕念軍興日久，生民塗炭，寢食難安，而帑餉孔亟，萬不得已，借資民力。各省督撫應如何善體朕意，督率紳士耆民，速籌妥辦，以濟時艱，該部接奉此旨，卽通行。

各督撫將辦理情形捐輸成數隨時具奏至各省倉穀爲數甚鉅均可酌量售變以濟餉需著該部分咨各省一體遵辦毋得藉詞諉卸將此諭令知之○諭戶部奏急籌接濟庫款一摺見在庫存銀兩不敷七月分應放各款之用必須妥爲籌畫以應急需前據裕瑞奏糶變倉穀一百萬石該部照成案覈算約可得價六七萬兩著卽飭屬趕緊糶變惟該省距京較遠所變穀價恐一時未能解到著哈芬於山西省先籌銀十五萬兩張祥河於陝西省先籌銀二十五萬均無論何款迅卽湊足委員趕解於七月內到部以供支放毋稍遲誤至山西陝西二省見辦防堵需用亦急著裕瑞先將應糶穀價籌墊銀四十萬兩分解山西陝西還款如此一轉移閒庶部庫供支可以不誤其餘變價銀兩仍著裕瑞迅速報部候撥毋令屬員藉詞延宕至庫款萬分支絀前有旨諭令哈芬張

祥河於殷實富戶暫爲那借並勸諭捐輸見在究有若干迄今未據覆奏軍需待用甚急朕心實深焦灼哈芬見已出省郭夢齡前辦捐輸頗有成效著卽督同紳士迅速籌辦徐繼畲幫同辦理防堵卽可就近與該撫藩商酌隨時知照各屬紳士勸諭商民以期及早集事其陝西捐輸並著張祥河督同紳士設法勸諭集有成數隨時奏聞請獎朕念軍興日久生民塗炭寢食不安而籌餉維艱不能不借資民力前已疊降諭旨該督撫等應如何剴切申勸妥籌迅辦爲民除患爲朕分憂也將此由六百里諭知裕瑞哈芬張祥河並傳諭山西布政使郭夢齡前任太僕寺少卿徐繼畲知之○壬寅諭內閣禮部尙書銜杜墀奏請停支全俸以備軍需一摺杜墀全俸銀米著照舊支領以資養贍用示朕篤念耆臣之意○曾國藩奏竊維戡亂莫先於得人而得一文臣尤莫如得一武

將臣到省以來畱心察訪大小將弁求其臨陣不怯爲士卒所信服者實難其人惟查有升用遊擊署撫標中軍參將塔齊布忠勇奮發習勞耐苦深得兵心軍士樂爲之用又有准補千總武舉諸殿元精明練達膽勇過人管帶辰勇百人操練日久各有兼人之藝塔齊布統領辰勇與該武舉同心努力皆思盡忠報效伏乞皇上天恩破格超擢當湖南防堵喫緊之際獎拔一人冀以鼓勵眾心如該二人日後有臨陣退縮之事卽將臣一併治罪 上諭塔齊布著賞給副將銜諸殿元著以守備補用先換頂帶以示鼓勵○諭曾國藩奏請將性耽安逸不理營務之副將革職治罪一摺湖南長沙協副將清德於去年賊匪攻撲省城時輒自行摘去頂帶藏匿民房迨至常澧一帶查辦土匪又復苛索供應每逢校場操閱該副將並未到過一次種種荒謬實堪痛恨當茲防剿喫

緊之際豈容此等不肖將弁濫列戎行毫無忌憚清德著卽革職
拏問交張亮基駱秉章訊明定擬具奏○諭軍機大臣等訥爾經
額奏續獲勝仗一摺此次烏蘭都及董占元兩路斬擒賊匪已不
下七百餘名若托明阿等所攻東南一路亦能得手則賊勢窮蹙
自易殲滅惟董占元在懷慶二十里鋪迎北安營未免距賊太遠
仍應飭令移營前進逼近賊壘進剿方能應手賊營恃其木板土
堆匿不出戰非踞守堅城可比且城外各路官兵聲勢甚壯若與
城內約期夾攻使賊無容身之地何難一鼓殲除該大臣見已統
兵進駐衛輝去懷慶密邇著卽就近嚴飭各路官兵合力圍剿迅
速蕲功萬不可任其竄逸致滋蔓延所稱後路布置一切均尙周
密惟慧成與容照所帶之兵甫至邳徐一帶水陸紆折卽使趕到
衛輝已屬緩不濟急前已有旨令其折回爲琦善等大營聲援該

大臣所稱扼守河岸之處著卽另派得力文武在彼駐紮可也將此由六百里諭令知之○諭駱秉章奏江西土匪竄擾桂東等縣業經斬擒多名並派員赴永州寶慶等府屬防剿粵匪各摺片據稱永興興甯桂陽等縣匪徒不難掃數殲除惟桂東一股雖已追殺數百名並獲首匪沙老七一名而首要各犯尙多未獲等語著張亮基駱秉章務卽督飭帶兵員弁不分畛域趕緊追剿毋令日久蔓延所有派赴江西之鎮筴鎮及附近各營兵六百名委都司孫漢煥統帶赴援見在江西剿匪喫緊之時務令趕緊前往毋稍延緩其前調赴江南大營之鎮筴辰州兵五百餘名儻江西不及截畱仍須續撥楚兵急籌接應至全州恭城一帶匪徒本日已諭令勞崇光派兵兜剿仍著駱秉章督飭帶兵文武員弁合力夾擊及早殲除其部撥粵海關餉銀仍由該撫就近催提撙節動用將

此由五百里諭知張亮基駱秉章並諭曾國藩知之○諭據駱秉章奏探聞廣西興安縣土匪千餘人於五月二十二日燒毀衙署戕害縣官二十八日竄至全州又恭城縣於五月二十四日夜有匪徒入城燒毀衙署等語廣西餘匪伏莽搜捕未淨刻下復出肆擾竟敢戕官焚署實屬罪大惡極全州恭城與湖南永州府屬之零陵東安永明等縣均係接壤若不迅速剪除恐匪徒裹脅日多更滋蔓延駱秉章見飭署衡永道徐嘉瑞馳赴永郡調撥兵勇督帶防剿著勞崇光卽派得力文武員弁率兵迅往合力兜拏務當不分畛域及早殄滅毋稍遲延見在廣西各屬情形並如何籌辦土匪之處均著該撫詳晰具奏將此由五百里諭令知之○癸卯諭內閣太僕寺卿王茂蔭奏發往軍營各員請飭察看以別去留等語自軍興以來內外臣工保奏各員疊經降旨發往各軍營差

遣委用惟該員等能否得力自須從實甄覈以免濫竽著各省統兵大臣於各該員到營後隨時察看凡已經著有勞績及才具可用實有裨益者自應畱營差委其於軍務不甚得力或有別項劣蹟者卽著奏明分別撤回查辦不得以特旨發往之員稍事姑容○諭本年正月閒逆匪自武昌潰圍而出竄入江省直撲金陵經江甯將軍祥厚等督飭文武官兵登陴守禦竭十數晝夜之力旋因城大兵單應援未至省城失陷朕聞祥厚於外城陷後力守內城猶復騎馬督戰手刃數賊被賊砍折馬足倒地身受數十傷殞命忠勇捐軀被害尤烈深堪憫惻祥厚著追贈太子太保銜照將軍陣亡例從優賜卹伊子乾清門二等侍衛恩全著賞給二等輕車都尉世職副都統霍隆武與該將軍同在小門騎馬督戰被鉤落馬身受數傷遇害亦慘霍隆武著照副都統陣亡例從優賜卹

以慰忠魂已革兩江總督陸建瀛由九江遇賊遽行折回貽誤事
機罪無可追前降諭旨革職拏問查鈔茲據怡良查明二月初十
日賊陷儀鳳門陸建瀛於十廟地方遇賊被害該革督雖經失律
於前尚不失城亡與亡之義陸建瀛著加恩賞還總督銜卽照總
督例賜卹所有查鈔家產均著賞還已故江甯布政使祁宿藻平
時辦事認真朕所素悉乃以籌防積勞於賊匪攻城之次日嘔血
殞命亦屬歿於王事祁宿藻著加恩照藩司軍營病故例加等賜
卹所有各該員任內一切處分悉予開復應得卹典各該衙門分
別察例具奏其餘同城文武各員如何殉難情形著該大臣督撫
等確查具奏候旨賜卹○向榮許乃釗奏_臣等據鄧紹良稟自六
月以來天氣酷暑營中兵將患病甚多飭令將弁各於該營營中
查點患病及受傷各兵勇於附近民房調治而近城營盤管礮兵

丁患病尤多正在分別募補突於十三日城中出有二三千賊前來撲營前三營兵勇出六成隊迎敵中兩營繼之忽北固山一帶衝出賊匪約三四千鈔截各營後路復於城垣開一暗門從旁衝出直撲大營施放火箭火罐寮棚帳房一時齊然七營俱焚兵已潰散和春管帶湖南等兵馳抵馬陵探知京峴山營盤被賊占踞丹徒鎮亦被賊匪焚燒和春卽由馬陵前駐新豐紮營以扼逆賊水陸兩竄之路俟兵勇陸續到齊相機拔營前進捐職都司劉廷鏌援救京峴山各營斃賊甚多因營盤被燬孤立無援隨卽還至丹徒駐紮聞鄧紹良已在丹陽亦暫退回丹陽旋卽馳往新豐堵剿等查鄧紹良旣因天氣炎熱病兵過多應隨時散遣招補豈可任其散漫無紀致賊分路誘戰猝墮詭謀賴有潮勇力戰抵禦屢挫兇鋒丹陽常州一帶得以安堵皆由潮勇之力該都司劉廷

鏃駕馭得法號令甚嚴各勇皆肯用命惟該勇人數僅止七百名亦恃副將瑞格等所帶川黔兵一千五百名屯紮南門一帶接應始能阻遏賊鋒當此挫衄之餘尤宜分別功罪以昭懲勸除統領乖方之提督鄧紹良已請旨革職治罪外所有鎮江失守營盤之將弁等皆不能奮力接戰固守營盤以致兵勇潰散均應請旨革職治罪以肅軍令惟念該員等從征數載著有微勞一經革職轉得置身事外可否責令帶兵打仗效力贖罪至陣亡之鎮軍千總唐彪等請飭部從優賜卹其接應出力之管帶潮勇捐職都司劉廷鏃請旨以都司儘先補用用昭激勸 上諭向榮許乃釗奏查明失守營盤及接仗出力人員請旨分別懲勸一摺此次官兵失利實因備禦疏懈致賊分頭誘戰墮其詭謀鄧紹良平素打仗尙知奮勉是以疊加恩擢洊升提督乃身統重兵未能迅速攻克鎮

戚轉以無備失事實屬孤恩有負委任僅予革職不足蔽辜著向榮等卽將該革員按律定擬罪名具奏仍交向榮軍營責令戴罪自效其失守營盤之將倘若概予革懲轉得置身事外所有湖南撫標參將韓世禧著以都司降補永州鎮右營遊擊朱占鼐著以守備降補鎮筸守備儘先都司鄺益茂辰永道標守備儘先都司劉嘉祥辰州城守營千總儘先都司鄧紹英均著註銷儘先都司與寶慶守備田宗揚一併降爲千總韓世禧朱占鼐劉嘉祥鄧紹英均著拔去花翎鄺益茂田宗揚均著拔去藍翎以示薄懲仍責令剿賊自效儻再不知愧奮卽行嚴參治罪捐職都司劉廷鏌管帶潮勇駕馭得宜屢挫賊鋒著以都司儘先補用其陣亡之鎮筸千總唐彪著交部照例議卹舉人揀選知縣賀長庚著交部從優議卹和春已有旨令其署理江南提督卽著督率鎮將迅復郡

城毋令逆匪竄逸○諭軍機大臣等前經疊降諭旨令訥爾經額等嚴飭各路官兵迅剿河北賊匪諒該大臣等定已妥籌迅辦矣朕思懷慶西北直通澤潞東界衛輝距畿輔甚近賊匪渡河以來瞬將卅月該郡城火器最多賊所覬覦且堅守已久城中乏食逆匪盤踞城外分布四門並於要路及交戰處所均挖濠阮蓋板鋪土外紮木營時用地雷攻城城中危急情形不堪設想官軍雖屢次獲勝而城圍未解內外信息不通設再延時日城中糧餉不支事有不可測者恩華托明阿保勝李德見均帶兵趕到兵力不爲不厚而我軍紮營距城每在十里二十里之遙外援雖多與城內隔絕何能約期並舉內外夾擊力解重圍前命訥爾經額爲欽差大臣責以肅清河北諸臣亦皆統帶重兵赴援戰勝攻取豈容稍事遷延著該大臣卽督率諸軍揀選驍勇精銳或四面圍攻或出

奇兵衝入賊營使該逆驚擾不能相顧則城中官兵便可開門追擊賊勢必潰乘勢兜剿定可一鼓殲除河北關繫萬分緊要餉需亦接濟維艱該大臣等豈不知之儻懷慶稍有疏失以致賊匪盤踞分竄朕惟該大臣等是問又聞二十一日之戰董占元已偏近賊壘黑龍江官兵忽勒馬退回以致自相踐踏並被賊追殺傷亡兵丁且有參將千總在內何以未見奏到西凌阿係戴罪圖功之員此次黑龍江官兵是否另員管帶若仍係舊隊又有失機則西凌阿罪無可追抑係續調之兵卽著該大臣迅速查明按律參辦毋得稍事姑容至懷慶迤北東西一帶山徑最雜均著派委密防並知會哈芬嚴加防範不可稍涉大意朕日盼捷音難安寢饋日來如何接仗解圍情形著迅速具奏以慰廑念將此由六百里加緊諭令知之○諭向榮許乃釗奏派往鎮江官兵扼要駐紮逆匪

不敢南竄一摺見在和春管領官兵已馳抵馬陵旋由馬陵前駐辛豐以扼賊匪水陸南竄之路大局尙未決裂惟鎮城日久未復急宜督兵進剿著該大臣等嚴飭和春等分路進攻務將丹徒鎮賊匪悉數殲滅麟桂所帶水師艇船見在調泊何處作何布置怡良接奉前旨諒已馳赴該處著卽督同將弁水陸夾攻剋期克復並宜加倍嚴防斷不可以南路無虞稍涉大意至金陵與賊相持已逾數月之久屢經降旨嚴催何以悠忽至今尙謂無可乘之隙兵力疲乏總因日久無功該大臣等見在如何籌畫隨時奏聞以慰朕念前發往向榮軍營差委之已革廣西候補州同楊培堃有人奏稱該革員出身不正著向榮詳加察看據實具奏無稍徇隱將此由六百里各諭令知之○諭陸應穀奏官兵追剿賊匪疊次斬獲情形一摺賊匪渡河經柏山經文岱於十二至十六等日疊

次追剿斬獲甚多餘匪竄往羅山正陽一帶其遂平縣逆匪亦經知縣劉鴻勳督同兵勇斬擒十餘名該匪節經剿殺所餘諒亦無幾惟羅山正陽一帶爲擒匪聚集之所急宜防其勾結該撫繞道上蔡汝甯遏其東竄並咨催經文岱等迅往會剿著卽嚴飭該總兵等分路兜捕務將此股賊匪悉數殲除毋令與擒匪勾結爲患另片奏桐柏縣知縣潘樹霖緝匪被圍經知府顧嘉蘅帶兵赴援該匪恃眾抗拒知縣被戕急應嚴拏懲辦顧嘉蘅於南陽地方情形素所熟悉何以於此次土匪滋事竟未能盡數捕獲柏山追剿逆賊正在喫緊之際今該撫飭令赴桐柏會剿土匪其羅山一帶情形是否兵力單弱仍著酌量辦理總宜先其所急不可顧此失彼至該部精兵四千見在河北正當會剿之時斷不能分兵前進倘兵力實有不敷該處與陝楚毗連著該撫卽行咨商舒興阿於

所帶防兵內酌量分撥襄陽防兵亦可咨商張亮基就近酌撥協
勦相機妥辦勿涉張皇將此由六百里諭令知之○是月蠲緩湖
北興國等十六州縣暨屯坐各衛被擾新舊額賦漕項銀米